

修訂日期: 2009/04/22 發行日期: 2009/5/9

發行單位: 中華電子佛典協會 (CBETA) <http://www.cbeta.org>

資料底本: 卍新纂續藏經 Vol. 73, No. 1451

原始資料: CBETA 人工輸入, CBETA 掃瞄辨識

## No. 1451-A慈受深和尚語錄序

右朝散郎充徽猷閣待制提舉江州太平觀賜紫金魚袋 韓駒 敘

古之教者。未始不以文字。至梁達磨。始不立文字。以教其徒。然謂之不立。則文字已彰。而況其餘乎。自達磨以來。凡為人師者。其徒往往私記其說。謂之語錄。蓋今禪說之在天下。無慮數千萬言。又安在其為不立哉。若知文字性空。說本無說。則雖數千萬言。猶為不立也。

慈受老人。始居資福。退而菴于蔣山之崦。累年。名益有聞。由是六遷法席。三奉

天子之命。所至。學者歸之。其平生所說法具足矣。有能聽之。如樹林水鳥。則人得以悟入。其功不細。稍尋繹之。則豈獨說法者之過。為之敘者。與有罪焉。紹興三年。十一月旦日。

## 慈受深和尚廣錄目次

卷第一序

資福禪寺語錄

焦山禪寺語錄

慧林禪寺語錄

卷第二偈讚

卷第三序

慧林禪寺陞堂頌古上

卷第四頌古下

慈受深和尚廣錄目次(終)

## No. 1451

### 慈受深和尚廣錄卷第一

#### 慈受深和尚資福語錄

侍者 善清 編

師於政和三年。八月初十日。在長蘆受請。拈起帖云。不奈諸人苦再三。薄緣終是自多慚。曉猿夜鶴應相笑。特地伸頭入閘籃。

便度帖。與維那。

師於祖照禪師手中。接得法衣云。雞足收藏之後。雲鎖千峯。曹溪分付已來。聲傳萬古。若非宗門苗裔。祖室兒孫。誰敢承當地底。遂展開云。不圖特地光華。且要毛色有異。

披法衣了。師顧示大眾云。要見拆半破三。唱九作十。須向高高處。與諸人相見。

師遂陞座云。塵埋古鏡久偷安。匿耀潛輝度歲寒。今日光明藏不得。虛堂高掛任君看。莫有分妍別醜底麼。便請出來鑑照。

僧問。師今已受儀真請。末頭一句若為宣。師云箇。進云。一字流通。千車同轍。師云。曹溪路上少人行。進云。須知雲水難藏。自有龍神推出。師云。老僧不知。僧問。昔日北禪請不去。今朝資福便承當。為復是因緣有地。為復是時節使然。師云。流水下山。方圓任器。進云。有心用處還應錯。無意求時却自然。師云。有心無心都未是。

師乃云。開頂門正眼。照古照今。放腦後神光。無內無外。若是箇中人。於照處不留情。光中常獨露。問處似箭鋒相拄。答處如膠漆相投。拈出向上鉗鎚。拽出金剛寶劍。正當恁麼時。還有相見麼。不見趙州云。有佛處不得住。無佛處急走過。三千里外。逢人不得錯舉。既然如是。因什麼到者裏。三間茅屋。一請便行。良久云。劍為不平離寶匣。藥因投病出金餅。

師在長蘆辭眾。僧問。師今欲入紅塵去。臨岐相別意如何。師云。黃葉紛紛古路頭。進云。自慚多逆順。不得從師行。師云。著上芒鞋未是遲。進云。特把一聲歸去笛。夜深吹過汨羅江。師云。又却恁麼去也。師乃云。一動一靜。似野鶴之翱翔。或卷或舒。如浮雲之聚散。休分南北。豈有去來。道人之心。亦復如是。若恁麼也。便乃紅塵鬧市。虎穴魔宮。觸處皆渠。無往不利。青山綠水。頗稱幽情。紅蓼白蘋。頓光行色。便請。輕帆高挂。短槳頻搖。一句臨岐。不勝珍重。

師於八月十七日入院。便歸方丈。踞座云。摩竭當年獨掩關。銀山鐵壁莫追攀。如今大施門開也。魔佛休分聽往還。

遂鳴鼓陞座。

僧問。遠別碧蘆江岸。已屆白沙道場。如何是不動尊。師云。一時坐斷。進云。風行草偃去也。師云。看取令行。進云。作家宗師。出世太晚。師云。鞏縣茶瓶。師乃呵呵大笑云。數間茅屋不堪憂。底事來為粥飯頭。賴有劫初鈴子在。隨貧隨富自風流。只如劫初鈴子。如何樣度。作何音響。遂將拄杖。卓一下云。輕輕一振動乾坤。

上堂。僧問。牛頭未見四祖時如何。師云。打鼓弄猢猻。進云。見後如何。師云。鼓破猢猻走。

續有僧問。鼓破猢猻走。意旨如何。師云。伎倆俱休。進云。不因一事。不長一智也。師云。汝休未得。師乃云。未得入門者。時中須有交涉。已得入門者。却要無

交涉。已得入門者有交涉。如龜負圖。自取喪身之兆。未得入門者無交涉。似捨父逃走。無有到家之期。然後有交涉。却要無交涉。無交涉中。却要有交涉。直饒到者般田地。正是門裏出身。須知身裏出門。且道。身裏出門一句。作麼生道。曾被佳人和淚罵。至今羞見雨中華。

重陽上堂云。年年此日是重陽。籬菊如聞去歲香。莫笑枝條太枯槁。從今別有好商量。會麼。已得真人好消息。且道。是什麼消息。新米麻餐滋味好。那堪喫處著沙糖。

上堂。卓拄杖一下云。資福一著。商量即錯。明眼衲僧。無繩自縛。又卓一下云。資福一竅。最玄最妙。直下會得。教儼冷笑。

上堂云。有問有答周遮。無言無說話墮。直饒頑石點頭。爭似歸堂向火。

因雪上堂云。失却欄中白象兒。臨風笑倒老峨嵋。街頭措大無精鑒。一夜燈前賦雪詩。貧道也與儼一箇對囑。良久云。橋橫銀螻竦。石臥玉麒麟。

上堂。僧問。至理一言。轉凡成聖。學人上來。請師一接師垂一足。僧云。學人便恁麼去時如何。師收足。僧禮拜云。大眾霑恩。學人禮謝。師便下座。歸方丈。

上堂。舉德山示眾云。釋迦老子。是臭臊胡。文殊普賢。是擔屎漢。等妙二覺。是客作兒。聲聞緣覺。是守墳墓鬼。一大藏教。是拭不淨故紙。雲門云。讚佛讚法。須是德山。資福即不然。德山謗佛謗法。墮在十八重地獄底。項帶鐵枷。身臥鐵牀。飢吞鐵丸。渴飲銅汁。因什麼如此。只為伊略無些子佛法身心。資福恁麼道。還有佛法身心麼。且道。有佛法身心好。無佛法身心好。莫將閑話為閑話。往往事從閑話生。久立珍重。

上堂云。春風掃盡庭前雪。暖日催開枝上花。物物頭頭皆漏泄。莫教心地亂如麻。人人是佛。眾生日用不知。各各圓成。誰解回光返照。只為情生智隔。想變體殊。不能直下承當。往往當面蹉過。不見僧問法眼。慧超咨和尚。如何是佛。眼云。汝是慧超。師云。者箇說話。須是箇一刀兩段底漢。始得。其或擬議思量。便見千山萬水。

上堂云。若論此事。如摩醯首羅三目。又如圓伊三點。一隻眼纖毫不挂。一隻眼萬像頓彰。一隻眼真俗混同。衲僧家。到者裏。更須別具一隻正眼。始得。還相委悉麼。銅頭鐵額莫商量。

上元節上堂云。衲僧不用看他燈。自有從前一盞明。壞衲蒙頭面壁坐。靈光射破鐵圍城。

上堂云。萬劫輪回妄想在。一心纔歇死生休。佛魔是甚閑家具。撒手懸崖得自由。且道。自由一句。作麼生道。自小持齋今已老。見人無力下禪床。

上堂云。一法若有。毗盧墮在凡夫。萬法若無。普賢失其境界。若得有無都盡。凡聖混同。南泉不用喚如如。趙州不在明白裏。譬如洪爐猛焰。豈分釤鉤餅盤。明鏡

當臺。休問青黃赤白。正當恁麼時。且道。有照有用。能殺能活一句。作麼生道。良久云。牆壁有耳。

上堂云。學道做工夫。正如人鑿井。一日見泉源。平生用不盡。且道。受用不盡一句。作麼生道。一滴普霧沙界潤。十方休聽轆轤聲。

上堂云。仲春天氣喜初晴。燕語彫梁有好聲。會得玄沙當日意。便能日午打三更。卓拄杖一下云。活鱗鱗地。非常伶利。德山覩著骨毛寒。不用南山尋鱉鼻。

上堂。僧問。什麼人不被無常吞。師云。只恐他無下口處。僧云。恁麼則一念通玄箭。三尸鬼失針也。師云。汝有一念。定被他吞了。僧云。無一念時如何。師云。捉著閻梨也。師乃云。漚生漚滅幾千回。只為金剛眼不開。一日愛河波浪息。始知無去亦無來。汝等諸人。波浪息也未。金剛正眼開也未。此眼若開。照了萬法。如夢如幻。當知此身。如影如響。坐斷千聖路頭。不落祖師階級。亦無人亦無佛。大千沙界海中漚。一切聖賢如電拂。咄。

上堂。舉玄沙和尚。指燈籠問僧。我喚者箇。作燈籠。儻喚作什麼。僧云。某甲亦喚作燈籠。沙云。盡大唐國內。未有一人會佛法。

師云。不知。會佛法底人。喚燈籠作什麼。

上堂。舉大慈寰中禪師示眾云。老僧不解答話。只是識病。時有僧出。慈便歸方丈。

師云。大慈酌然識病。只是無藥。

上堂。舉趙州問南泉。知有底人。向什麼處去。泉云。向山下作一頭水牯牛去。州云。謝師指示。泉云。昨夜三更月到窓。師云。南泉搖頭。趙州擺尾。子細看來。二俱失利。

病起上堂。僧問。昔日維摩在病。蓋為群生。今朝和尚不安。當為何事。師云。今日遭人檢點。僧云。和尚有病。眾人盡知。眾人有病。如何醫得。師云。閻梨宜喫薑附湯。僧云。劔為不平離寶匣。藥因投病出金瓶。師云。儻道。佛病祖病。相去多少。僧云。一筆勾下。師云。蒼天中更添冤苦。師乃云。病瘳鶴骨瘦稜稜。說妙談玄總不能。賴有同行木上座。是渠強健更惺惺。遂拈拄杖。卓一下云。儻既惺惺。請為大眾。說一上禪。擲下拄杖。便歸方丈。

解夏上堂云。天下叢林。今朝解制。多少衲僧。重添意氣。布袋頭既已放開。草鞋錢各須自備。萬里無寸草處。薦取洞山家風。三十棒責情要。會取雲門關捩。且道資福意。在什麼處。良久云。逢人不得錯舉。

上堂。僧問。雲門道。十五日已前。即不問。十五日已後。道將一句來。未審古人意旨如何。師云。今日十七。僧云。日出東方。夜落西也。師云。且信一半。僧云。十五日已後如何。師云。分身兩處看。僧云。恁麼則人從陳州來。却向許州去也。師云。識甚好惡。師乃云。古人貧不及。今人富太過。唯有慈受叟。家風不恁麼。有

油便點燈。有炭便向火。無油無炭時。大家黑處坐。坐得骨腎痛。長伸兩腳臥。天明起來喫粥。說甚迷達磨。

師到長蘆。眾請陞座。僧問。十江岸上。古佛場中。二老相逢。合談何事。師云。六耳不同謀。進云。祥煙生座席。瑞氣起庭除。師云。好事不如無。進云。可謂知音知後更誰知。何必清風動天地。師云。獨有闍梨未相識。進云。從來鼻孔遼天。不受他人澆潑。師云裂轉。進云。久聞資福有此機要。師云。特地一場愁。進云。大眾證明。學人禮謝。師乃云。道在何曾有間然。休分城市與林泉。重來問法棲禪處。依舊清風滿目前。信知法無固必亦隨緣。在山林則一事不為。入塵勞則萬機俱掃。一動一靜。無非真淨界中。或去或來。盡是菩提場內。如拳作掌。開合有時。似水生波。起滅無定。是以長蘆唱起雲門曲。資福和起德山歌。拍拍無私。頭頭有據。更不談玄說妙。抑古揚今。自然水乳和同。休問溪山各異。然雖如是。忽若有箇氣不平底。出來。高聲喝云。不會為客。吵噪叢林。又教資福如何祇對。良久云。泊合停囚長智。

冬至上堂云。今朝一陽生。明日便數九。張三依舊肥。李四從來瘠。喫盡天下藥。舊病依前有。用盡自家心。笑破他人口。為什麼如此。花根本艷。虎體元斑。

上堂云。一夜飄空大雪。玉殿銀樓皎潔。曉來庭際無人。莫道山僧不說。雖然如是賺殺人。

歲旦上堂云。東風吹盡曉天雲。大地山河總變春。不用當門書大吉。箇中無鬼亦無神。

上堂。舉僧問雲門。久雨不晴時如何。門云。筭。有人問資福。久雨不晴時如何。山僧祇對他道。收。雲門筭。資福收。一擒一縱。各有來由。昨夜春風吹樹尾。曉來紅日上雲頭。飄笑雙林傅大士。却道橋流水不流。

上元節上堂云。夜來燈燭鬪熒煌。多少眾生徹曉忙。究竟不知燈是火。昧却靈臺一點光。還有回光返照底麼。歸堂喫茶去。

上堂云。今朝喫粥太晚。徐六街頭擔板。只知打鼓陞堂。不覺又是喫飯。喫粥了喫飯。喫飯了喫粥。清風月下守株人。涼兔漸遙春草綠。

上堂。舉雲居齊禪師問僧。從什麼處來。僧云。堂中來。齊云。何得妄語。僧無對。

師云。者僧是小妄語。雲居是大妄語。

上堂。舉魯祖。凡見僧來。便面壁。梁山有偈云。魯祖三昧最省力。纔見僧來便面壁。若是知機達道人。自然當下便心息。

僧又請益瑯琊廣照。照云。祖師面壁播諸方。多少衲僧謾度量。最好晚來江上望。數枝寒栢倚斜陽。

師云。資福不是雌黃古人。只圖大家知有。魯祖面壁。詞窮理寡。廣照梁山。見蛇先怕。若問慈受。劈脊便打。

佛鑑禪師。退智海。過資福。師上堂云。太平山下曾相見。撫掌呵呵笑臉開。莫怪嘉聲騰萬口。杖藜方自日邊來。下座後。拜請禪師。為四眾。說幾句子。東京城裏話。

且日上堂云。金輪御世乾坤永。玉燭調時宇宙明。桃李無言春爛熳。不知何以報昇平。

上堂。舉趙州坐次。侍者報云。大王來也。州下繩床云。大王萬福。侍者云未在。州云。又道來也。

師云。一等是蘿蔔頭禪。纔落趙州手裏。不妨好滋味。

上堂云。有處不是有。敲禪床數下云。喚作無得麼。無處不是無。豎起拂子云。喚作有得麼。有無不是處。佛祖沈蹤。馨香滿道途。是處墳溝塞壑。明眼漢。試檢點看。

上堂。舉陸大夫問南泉。弟子家中。餅內養一鵝兒。邇來漸大。欲出此鵝。又不得打破餅。又不得損却鵝兒。未審和尚。有方便。泉召大夫。大夫應諾。泉云。出了也。師云。南泉鼻孔。在陸大夫手裏了也。當時纔見他恁麼問。但向他道。儻肚裏。有許多計較。又云。佛法不是者箇道理。

上堂。舉鴻山道。自小牧一頭水牯牛。擬向溪東放。不免食他國王水草。擬向溪西放。不免食他國王水草。不如隨分納些些。師云。鴻山大似野老不知堯舜力。耕田鑿井過餘生。殊不知。人人分上。牧一頭水牯牛。十二時行履底。是國王田地。飲啖底。是國王水草。從來頭角崢嶸。況是毛色有異。諸人還識得也未。若也識得。無恩不報。無法不通。其或未然。東西南北休分別。盡在吾皇一化中。

上堂云。古人道。忍辱。三世冤家從此盡。饒饒。萬禍千殃從此消。默默。無上菩提從此出。

師云。會得此三種了。好箇不快活漢。山僧祇是得人一牛。還他一馬。潑水相唾。插觜廝罵。卓拄杖一下云。平出平出。

上堂云。流注真常幾萬回。虛空無去亦無來。箇中何地容生死。打破當堂明鏡臺。

上堂云。天面鷹橫七八點。海門日上兩三竿。祖師心印分明在。自是時人不解看。直饒看得。也是方木逗圓孔。

上堂。舉紫胡半夜在僧堂中。叫捉賊捉賊。眾僧驚起。有一僧。被胡捉住云。捉得也。捉得也。僧連聲叫。不是。我。胡云。是即是。只是儻不肯承當。

師云。紫胡也是按牛頭喫草。

上堂云。心境頓消融。方明色與空。欲識本來體。青山白雲中。

師云。龍濟和尚恁麼道。拋砂撒土。向後人眼裏。直至而今。玄黃不辯。山僧今日為諸人。金鑠刮膜。整頓雙睛。令他箇箇。別開頂門一隻眼。心境頓消融。方明色

與空。欲識本來體。遂豎起拂子。良久云。海裏使風山上船。

上堂。舉雲門云。有三種人。一人因說得悟。一人因喚得悟。一人聞舉便迴去。且道。聞舉便迴去。意作麼生。好與三十棒。

師云。雲門大似見兔放鷹。

大雪上堂云。四維上下白漫漫。玉殿瓊樓正好看。任是黑風吹海立。渠儂門戶不相干。曹溪路上。絕蹤絕跡。少室巖前。滴水滴凍。鹽官扇子。拈放一邊。趙州布衫。略無暖氣。正當恁麼時。如何是寒暑不侵底句。石女解裁無影樹。木人能種火中蓮。

歲旦上堂云。時人皆拜歲。山僧不賀年。孟春猶寒在。日月幾曾遷。去年今日後。今日去年前。新舊不同者。誰後復誰先。

師云。大小龍濟山主。被一箇舊歲新年礙却。說得許多道理。終未免黏脣污齒。慈受叟即不然。時人皆拜歲。山僧也賀年。光明一點在。從聽二輪遷。順俗高叉手。和光小說禪。箇中如會得。佛祖本無傳。

退院辭眾。上堂云。三年住此空花相。今日歸歟水月同。去住不須論彼此。人生萬事轉頭空。修習空花萬行。宴坐水月道場。降伏鏡裏魔軍。成就夢中佛事。是知。三世諸佛說夢。六代祖師說夢。天下老和尚說夢。今朝資福說夢。說此一夢。三年零七箇月。其間有利根者。輕輕喚著。便乃回頭。有根性暗鈍者。至今猶在夢中。山僧有箇驚瞌睡底句。臨行不免傾腸倒腹。盡為諸人道却。照顧鼻孔乍遠。伏惟珍重。

## 慈受深和尚焦山語錄

### 侍者 善隨 編

師於政和七年。九月初六日。在蔣山受請。拈起 敕黃云。九重天上官家敕。喚起西菴瞌睡人。為瑞為祥人莫問。金毛師子玉麒麟。恁麼會得。便使山林增秀氣。泉石長清輝。其或不然。却請維那高宣一遍。

宣敕罷。師陞座。

僧問。避喧求靜。處世未有其方。再起西菴。如何是為人一句。師云。倚天靈刃照人寒。進云。恁麼則青山藏不得。明月却相容。師云。知心有幾人。進云。好酒無深巷。釀醋足人沽。師云。噇酒糟漢。

師乃云。法無凝滯。去來本體皆如。道亦隨緣。溪山何曾有間。須知。住中無住而却住。行時不行而却行。開門方喜冷啾啾。平地忽然闊浩浩。如拳作掌。開合有時。似水生波。動靜無定。且道。不涉去來底。是什麼人。月行雲外無心照。水到人間任運圓。

蔣山辭眾上堂。僧問。將離鐘阜。未到焦峯。不涉兩頭。請師速道。師云。秋空飛一鴈。砧杵夜千家。進云。鐵甕城邊生瑞氣。海門峯頂鎖重雲。師云。他日焦山。

與爾一盞茶喫。進云。大眾證明。學人禮謝。師云。彼此沒便宜。師乃云。□忻得計掩深關。口醭心灰一味閑。自笑行藏無料處。又隨緣業過焦山。

師至九月二十四日入院。歸方丈。踞座云。一室寥寥是何物。三賢十聖競頭參。衲僧不會風前句。擬欲思量落二三。

上堂。僧問。古人面壁。意旨如何。師云。口是禍門。進云。世間多少事。盡在不言中。師云。爾鼻孔。在我手裏了也。進云。久聞和尚令嚴。師云。垂釣手徒勞坐釣臺。師乃云。白蘋紅蓼岸邊秋。短漿輕帆與自由。要會到家一句子。長江依舊水東流。

上堂。僧問。如何是佛。師云。擔水河頭賣。進云。佛向上更有事麼。師云。靈利人難得。師乃云。十一月二十。喚做大冬日。張三賀鄭婆。李四拜王七。早辰到夜。費盡平生力。唯有衲僧家。不打者鼓笛。為甚如此。鐵額崑崙兒。通身黑如漆。

上堂。僧問。如何是無爭三昧。師拈拄杖。走下座。打僧三下。僧叫云。某甲有什麼過。師放下拄杖云。爾不早道。便歸方丈。

臘八上堂云。瞿曇學道時。菩提樹下坐。忽爾見明星。漆桶便打破。纔打破始信。從前燈是火。今人學道不悟道。義路推尋外邊討。更說從來無悟迷。大似團團吞却棗。

上堂。僧問。知有。說不得時如何。師云。啞子喫蜜。進云。道得。不知有時如何。師云。鸚鵡喚人。僧禮拜。師云。者傳語漢。師乃云。今日端午謝街坊。時節因緣要舉揚。莫問腕頭纏百索。且將粽子喫沙糖。且道滋味在什麼處。冷物也宜少喫。

上堂云。是柱不見柱。非柱不見柱。是非已去了。猶較三百步。

上堂。舉雪峯拈拄杖云。識得拄杖子。一生參學事畢。羅山聞云。識得拄杖子。更買草鞋行腳。師云。識得拄杖子。恁麼也得。不恁麼也得。

上堂。舉僧問夾山。如何是夾山境。山云。猿抱子歸青嶂後。鳥銜花落碧巖前。法眼道。我二十年。祇作境會。師云會麼。當門種棘多針刺。惹破兒孫無限衣。

上堂。僧問。佛未出世時如何。師云。雲中藏玉兔。進云。出世後如何。師云。日裏放金烏。師乃云。五五二十五。一句超今古。夜來石公山。有箇歡喜處。諸人還知麼。

上堂。僧問。有求皆苦時如何。師云。只為不知足。進云。知足後如何。師云。不見有苦。師乃云。承言須會宗。勿自立規矩。石公山走入你鼻孔裏去也。還知麼。若道知。礙塞殺你。若道不知。燈籠露柱欺你去。

上堂。僧問。佛魔不到處。如何體會。師云。道什麼。進云。恁麼則絕行蹤去也。師云。展手不逢人。師乃云。焦山句句是藥。祇要時人安樂。費盡巴豆砒霜。轉見七零八落。諸人步步是病。終日頭旋眼運。祇管以火救火。不解頭正尾正。忽有箇漢。出來云。和尚恁麼道。也是甘草口子。黃連肚皮。師大笑云。也有些子。

蔣山佛鑑禪師遺書至。上堂。僧問。法船沒法幢摧。無限悲風匝地來。未審鍾山何處去。請師高震一聲雷。師云。拄杖無情也皺眉。進云。佛祖位中留不住。人間天上任遨遊。師云。你還喚得應麼。進云。今古應無墜。分明在目前。師云。一箇棺材。兩箇死漢。進云。學人今日也要助哀。師云。泥人眼赤。師乃云。宗門標致久淒涼。佛鑑山頭又坐亡。昨夜燈前即屈指。不知誰解整頽綱。此際法門不幸。蔣山佛鑑禪師。今月初八日。遽然坐亡。凶書既至。聞問之初。使人短氣。然則衲僧家。生也如同著衫。死也還同脫袴。又何悲悼哉。在佛法淡薄之際。紀綱委地之秋。得人則興。失人則廢。西望靈龕。不勝哀戀。

師召大眾云。還會麼。惆悵鍾山老水牯。去住縱橫無必固。拔楔抽釘二十年。咬盡生薑呷盡醋。有時貧。有時富。誰會南山狗咬虎。紛紛衲子數如麻。不知誰解吞蓬句。聽取焦山重指注。若道鍾山有句。大似如藤倚樹。若道鍾山無句。正是沈埋佛祖。且道。畢竟如何。乃以手掩面。下座。

上堂。僧問。四大五蘊。自何而得。師云。春風纔過處。池水自成紋。進云。直得湛然時如何。師不對。進云。却是學人。無風起浪也。師亦不對。僧長噓一聲。師便打。師乃云。江月照。松風吹。永夜清霄何所為。若是曹溪門下客。相逢不必更揚眉。

靈巖長老退席到山。師上堂云。扁舟何事渡江來。林底相逢笑臉開。鹽米不須重話會。要須舌上起風雷。靈巖禪師。聞名有日。相見無門。何事扁舟惠然過我。可謂聞名。不如見面。見面又勝聞名。風前撫掌笑呵呵。萬事觀來皆戲具。是知虛空無我。任明暗以發輝。流水本閑。逐方圓而自在。所以王老師。不打者鼓笛。多少便宜。陳睦州。冷坐空房。不妨靜辨。者般病痛患過。方知古人涉世漫悠悠。大底要明者箇事。豈不見珠溪和尚訪臨濟。濟纔見。便喝。溪云。兩重公案。濟云。者野狐精。溪進前。提起坐具云。展即是。不展即是。濟又喝。溪收坐具便行。濟云賊賊。溪便出去。莫道無事好。

濟回首。問首座云。適來相見。有得失否。座云有。濟云。賓家失。主家失。座云。二皆失。濟云。失在什麼處。首座拂袖便行。濟云。莫道無事好。

後有僧。舉似南泉。未審三人意旨如何。泉云。大似官馬相踏。

師云。叢林中。商量盡道。臨濟握袖中靈刃。不令而行。珠溪擡掌上菱花。無心鑑物。師子窟中師子。首座方究端倪。要知卞璧無瑕。須是南泉和尚。然雖如是。子細看來。未免各有一場敗闕。且道。那裏是敗闕處。下座。却請靈巖禪師。為諸人批判。

上堂。舉六祖問僧。甚處來。僧云。嘗參臥輪和尚。得箇頌子。一生受用不盡。祖云。你試舉看。臥輪有伎倆。能斷百思想。對境心不動。菩提祇麼長。祖乃說一頌。慧能無伎倆。不斷百思想。對境心數起。菩提作麼長。

師云。者兩箇老漢。大似泥人與金剛揩背。何故。焦山別有一頌。有無皆伎倆。盡是人妄想。少府打手力。笑殺韓官長。

檀越看藏經上堂。僧問。寶藏未開時如何。師云。誰敢添註脚。進云。四十九年談不到。今朝方顯我師機。師云。爛泥中有刺。進云。開卷後如何。師云。藥山道底。進云。指天指地休謾我。截鐵須還本分人。師云。築著磕著處。你如何回避。進云。學人到者裏。祇得信受奉行。師云。將謂你是箇作家。師乃云。佛從大悲心。流出十二部。琅函與玉軸。遍滿河沙數。言言皆妙藥。字字超今古。譬如優曇花。百劫難遭遇。又如大明燈。能破黑暗處。又如智慧力。能斷無明樹。又如瓔珞珠。能使人豐富。茫茫塵世人。急急走如兔。不覺老到來。未嘗開眼覲。獨有花評事。信向頗堅固。命我無心人。轉此諸佛語。浮生一百年。正如草頭露。上牀鞋履別。保朝不保暮。少喫兩塊肉。多燒香一炷。羊鹿牛三車。皆行此條路。遂豎起拂子云。者裏會得。便可信受奉行。其或未然。各請作禮而去。

上堂。僧問。齋晚未聞鐘鼓響。慶贊為復是別有商量。師云。肯把金針度與人。進云。德山端的意。盡在不言中。師云。他是箇無齒大虫。汝是箇黃尾狗子。僧禮拜云。和尚是何心行。師云。老僧饒你不少。師乃云。鶴態雲蹤不定居。白沙一別半年餘。焦山脚下重相見。記得當時事也無。若記得當時事。即會如今事。若會如今事。方知十二時中。行住坐臥。拈匙把筋。未嘗不與山僧相見。其或涯際未分。一回相見一回老。悟取空花夢裏身。

送莊主上堂。舉百丈云。汝等為我開田。歸來與汝說大義。僧云。何必歸來。即今便請。丈展兩手。

師云。百丈恁麼說大義。辜負者僧。山僧今日。分明為你說破。焦山熱肺腸。有事便要了。今歲潤九月。來年春氣早。頂門三隻眼。常要光皎皎。照顧為山水牯牛。莫教喫却他人草。

道友入山。上堂云。焦山僻在海門邊。得到其中是夙緣。要會相逢一句子。春風依舊似當年。此一段事。譬如春風。周徧法界。隨地而生。過梅檀林。其風必香。過鮑魚肆。其風必臭。臭亦未嘗臭。香亦未嘗香。何以故。風性本無香臭。一切眾生。見有聚散。見有悲喜。見有去來。見有生死者。皆妄也。若恁麼明了。可謂處處真。塵塵盡是本來人。還會麼。衣中有寶年年在。眼裏無筋世世貧。

上堂云。春色無高下。春雷動地音。翻空一夜雨。滴破祖師心。僧問為山和尚。今日好雨。山云。那裏是好處。僧無對。山云。你問我。僧便問。那裏是好處。山指雨。僧禮拜。

師云。百尺竿頭進步。須是為山。雨中往來。畢竟不曾濕却鼻孔。既從雨中往來。為什麼。鼻孔不濕。祇為他一點也入不得。

上堂云。焦山無變豹。一味勸人休。眾生顛倒甚。撥火覓浮漚。石輦駕弓箭。俱祇豎指頭。直下歇得去。都如椀脫丘。

上堂。舉海上橫行逼道者。一日叫云。快活快活。僧問。和尚有快活。逼云。山前麥熟都收了。莫教辜負牧童兒。

焦山今日更快活。如逼道者。忽有人問。未審如何快活。祇對他道。廚裏有人做飯。堂中有人說禪。落得焦山長老。只管橫眠豎眠。

上堂。舉昔日有人。獲一塊鐵。鑄作一座方響。人聞之。便生逸樂之情。謂之樂器。後時却將方響。鑄作一口磬。人聞之。便生善。此人後因從軍。却將磬。鑄成一口劍。人見之。便生驚怖。後時又將劍。鑄成一尊佛。人見之。便生歸向。

諸人者。大都只是一塊鐵。因甚麼。起得許多驚喜善惡之念。只為你色見聲求。不能歸根得旨。還會麼。迷時境上千般有。悟去心中一物無。若會笑聲還似哭。方知生與死同途。復云。也須是打破虛空始得。

上堂云。動絃別曲。葉落知秋。隔牆見角。便知是牛。伶利衲僧。纔眨眼商量。已落第三籌。休休。不如無事掛心頭。

上堂。舉佛日才和尚。一日太守請陞座。僧問。應以宰官身。得度者。即現宰官身。而為說法。如何是宰官說底法。才云。錦繡筵中吹玉笛。僧云。畢竟如何。才云。笙歌座上語如春。

師云。佛日頂門具眼。肘後有符。當垂手之際。不妨奇特。點檢將來。只能放行。不會把定。忽有人。問慈受。如何是宰官說底法。只向他道。棒頭筆下宜精審。畢竟如何。打鎖敲枷好用心。

上堂。吾有一言。絕慮忘緣。巧說不得。祇要心傳。且道是什麼言。良久云多種濃陰樹。留與行人作歇場。

上堂云。我笑禪和子。茫茫能地頭。隨人語脉轉。何日得心休。

上堂。僧問。如何是海門境。師云。萬古掩不得。百川從此歸。進云。如何是境中人。師云。面如渥丹。進云。人境已蒙師指示。向上玄關事若何。師云。九九八十一。師乃云。滔滔生死海無涯。綠鬢朱顏未足誇。五蘊山頭雲散後。不知明月落誰家。者裏覩得透。塵劫來事。盡在而今。其或未然。而今事一時昧了。不見道。幾回生。幾回死。生死悠悠無定止。自從頓悟了無生。於諸榮辱何憂喜。只如無生。作麼生了。

上堂云。一切有為法。如夢幻泡影。如露亦如電。應作如是觀。師云。有為法。當如是觀。只如無為法。作麼生觀。一翳在眼中。盧醫拈不出。

上堂。僧問。如何是佛。師云。面黃不是真金貼。進云。如何是佛向上事。師云。一箭一蓮花。僧禮拜。師彈指三下。師乃云。不是境亦非心。喚作佛時也陸沈。箇中本自無階級。切忌無階級處尋。總不尋。過尤深。打破雲門飯袋子。方知赤土是黃

金。咄。

上堂。舉乾坤之內。宇宙之間。中有一寶。秘在形山。古人恁麼道。大似釘椿搖櫓。抱橋柱澡洗。致令後人。一向坐在死水裏。慈受有一寶。乾坤之內無處尋。宇宙之間著不得。有時埋在糞掃堆頭。有時掉向無事甲裏。即今在諸人眉毛上。還見麼。不要放穀。

上堂。僧問。德山入門便棒。臨濟入門便喝。當明何事。師云。殺人須見血。進云。理無曲斷也。師云。切忌詐明頭。僧禮拜。師便打。

僧問。古人道。參活句。不參死句。如何是活句。師云。南山白額虎。進云。如何是死句。師云。款出囚口。僧便喝。師云。也是棺木裏瞪眼。僧又喝。師便打。師乃云。大丈夫漢。莫受人瞞。喚作你作佛。已是無端。

上堂。僧問。先德道。本來無一物。壓殺世間人。未審過在什麼處。師云。閻梨眼皮薄。進云。認著依前還不是也。師云。幾人跳得出。師乃云。幸自可憐生。須要人道是。遍問王老師。踏破草鞋底。不如歇去好。

上堂云。紅杏枝頭小雨乾。東風特地作春寒。祖師門戶無遮障。祇要時人著眼看。遂豎起拂子云。還會麼。桃紅李白薔薇紫。問著春風總不知。

## 慈受深和尚慧林語錄

侍者 宗先 編

師於宣和三年。三月二十五日。在焦山受請。

拈起敕黃。示眾云。四年兩受官家敕。玉璨珠華耀海門。鼓舞堯風聊自媿。不知何以答君恩。若向文彩未彰時薦得。可謂無恩不報。無法不通。其或未然。還你箇叢林事例。遂付與維那。

宣罷陞座。

僧問。空中書萬字。文彩已彰。火裏生蓮花。清香有異。丹詔臨門。如何舉唱。師云。石女夜挑燈。進云。恁麼則萬丈白雲藏不得。一輪光景透無邊。師云。你分上。得箇什麼。進云。兵隨印轉將逐符行。師云。如何是最初步。進云。凭欄遙望江邊境。令人却憶老婆心。師云。又却恁麼去也。

僧問。動地天書到海門。不知師意若為論。師云。大蟲舌上書千字。進云。舜日與佛日增輝。皇風共真風竝扇去也。師云。知恩方解報恩。進云。真智不從人得。妙機本自天然。師云。那箇是汝妙機。進云。五葉芬芳傳少室。今朝大地一時春。師云。祇少閻梨一箇。師乃云隈巖傍水養衰殘。不謂虛名落世間。到此更無迴避處。只應笑倒石公山。石公山解笑。爭奈笑裏無刀。拄杖子點頭。却是他頭邊有眼。到者裏。三世諸佛。匿影無門。六代祖師。潛蹤無地。為什麼如此。祇為難逃至化。

師辭眾。上堂云。虎穴門前曾宴坐。龍牀角畔去談禪。諸人莫苦生離思。風月從來共一天。還有相送底麼。

僧出問。出門千里。一步為初。如何是最初一步。師云。拄杖撥開千聖眼。芒鞋踏破萬山青。進云。何事春風忽吹散。不能留得覆青山。師云。何用強生分別。進云。學人有箇末後句。還許當場道也無。師云。只恐汝道不著。進云。焦山幸有西菴在。留與禪師作退居。師云。鞏縣茶瓶 師乃云。住亦隨緣去是常。山林城市兩無妨。白雲本是無心物。一任風吹入帝鄉。大道無間。遇緣即宗。萬法有期。因時而會。休向孤峰頂上。盤結草菴。且於閻市門頭。訶佛罵祖。雖然如是。且道。臨岐一句。作麼生道。都來一箇虛空子。計甚東西南北人。某道薄人微。涉世疎謬。住持既久。曲荷諸人。乍爾東西。豈無依戀。更冀諸兄弟。時中一動一靜。依諸佛語。如說而行。依祖師語。以悟為則。若能如是。可謂江山雖遠。理契即隣。其或不然。何啻千山萬水。

時眾中有慟哭者。師告云。不用哭。老僧在此。四年零六箇月。將無作有。指東劃西。脫空謾語。誑惑諸人。今日識神自首。不敢覆藏。且騎石公山。渡楊子江。往東京城裏去也。伏惟珍重。

師五月五日入院。歸方丈。踞座云。一居丈室。家風壁立。把斷重關。有誰敢入。為什麼如此。直饒鐵眼銅睛漢。也是門頭戶底人。

上堂。僧問。深山中建立。未是作家。閻市裏舉揚。方為好手。如何是到家一句。師云。一條拄杖挑明月。萬事隨緣入帝鄉。進云。可謂上國有明主。深山無隱人。師云。葵藿有心終向日。進云。如是則已居上刹。放行西祖家風。今對人天。撥動雲門關捩。師云。作麼生是雲門關捩。進云。祥光舒戶牖。瑞氣滿庭除。師云。未在更道。進云。却請和尚道。師云。乍入院來。未欲行令。進云。謝和尚布施。師云。吽。師乃云。千山萬水路岐長。自喜親觀上國光。會得到家一句。入門切忌錯商量。且道。如何得不錯商量。若作佛法商量。埋沒自己。若作世諦商量。辜負祖師。到者裏。須知佛法人情。捏成一塊。齷齪言細語。不見兩般。恁麼也得。不恁麼也得。恁麼不恁麼總得。然後沒交涉。方可閑中取靜。忙裏偷閑。仰戴堯天。高歌舜日。然雖如是。且道。動靜不拘一句。作麼生道。遂撫掌笑云。青山誰管你閑事。白日[廓-享+墨]中自有人。某山林一慵懶人耳。學問道德。俱無所長。上荷 聖恩。掃灑當院。唯是夙興夜寐。補報 君恩。隱腹量心。但多惶恐。諸人者。古人道。相逢不拈出。舉意便知有。如何是知有底事。祇如長老入院。打鼓陞堂。問訊和尚。與諸人相見。者箇是拈出了也。那箇是知有底事。莫是焦山長老。千里之外。來慧林住持麼。不是者箇道理。莫是僧是僧。俗是俗麼。不是者箇道理。若也明得。千里同風。其或未然。對面千里。會麼。虛空昨夜翻筋斗。嚇倒西來碧眼胡。

上堂。舉昔日寶公和尚。令人傳語思大禪師。何不下山。教化眾生。只在山頭。目視雲漢。作什麼。思大云。三世諸佛。被我一口吞盡。何處更有眾生可度。

師云。思大恁麼說話。只知開口。不覺舌頭長。既有諸佛可吞。豈無眾生可度。若是山僧。即不然。自四月十六下焦山。或山路上行。或野店頭宿。也不見有諸佛可吞。為什麼如此。但知飢來喫飯。渴即飲水。困即啜茶。亦無眾生可度。為什麼如此。只為人人具足。箇箇圓成。蝦蟆蚯蚓。項佩圓光。白牯狸奴。胸題萬字。今日來到慧林院裏。與諸人相見。且道。與古人說話。是同是別。會麼。不勞久立。

師於五月二十二日。就大相國寺中。三門上開堂。師拈起疏。示眾云。卷之則聖。凡莫測。舒之則沙界咸聞。非圖激濁揚清。亦乃分緇別素。然雖如是。要見文不加點。絕妙好詞。却請表白宣過。

讀疏罷。師指法座云。物物頭頭不覆藏。須彌高廣露堂堂。要知此曲無音韻。更對薰風舞一場。便陞座。

拈香云。此一瓣香。恭為祝延 今上皇帝。聖壽萬歲。恭願。明齊二曜。壽等三山。雨順風調。民安國泰。

次拈香云。此一炷香。當為何人。氣息纔通不可收。一回拈起一回羞。威音王外難分雪。殃及兒孫卒未休。便恁麼燒却。又恐有不知香氣者。爇向爐中。供養我長蘆淨照禪師和尚。遂趺座。

智海法真禪師白槌云。法筵龍象眾。當觀第一義。師云。一槌便就。八字打開。更無絲髮覆藏。豈有纖毫障礙。若是英靈衲子。須便舌上風生。其或懵憧禪和。多分眼中雲起。莫有未點先行。不撥自轉底麼。

僧問。立雪齊腰斷臂人。曇花分得一枝春。未知今日開堂意。一句如何祝 聖君。師舉起拂子。進云。恁麼則金烏凝瑞彩。玉兔耀祥雲。師云。若是鶴子兒。點著飛千里。進云。五湖四海歸王化。一句無私樂太平。師云。祇道得八成。進云。却請和尚道十成。師云。大千沙界為天宇。億萬須彌作壽山。進云。祝聖已明於至道。為人端的合如何。師云。拄杖子未曾拈著。進云。作家禪師。天然猶在。師云。開口易。合口難。

僧問。法鼓一鳴丹鳳闕。金爐先爇紫檀煙。開堂上祝南山壽。願把西來密意宣。師云。曹溪水闊千尋深。少室峰高萬仞青。進云。一言妙契寰中旨。舌上風生四百州。師云。麗水一星金。流沙混不得。進云。九州和氣如三月。四海歡呼似一家。師云。如是如是。進云。為報諸方同道者。盡情施設贊明時。師云。直須恁麼。僧禮拜退

師乃云。直饒稻麻竹葦。草木叢。盡變衲僧。一一衲僧。通身是口。一口中。有百千舌。一一舌端。置百千問難。不消慧林舉起拂子。自然圓同太虛。無欠無餘。譬如一滴獅子之血。能變六斛驢牛羊之乳。悉化為水。不在安排。任運如是。況千聖靈機。群生本體。不落文字。豈涉言詮。卓爾現前。超然獨露。豈不見。臨濟禪師陞

堂。麻谷和尚出問。大悲千手眼。那箇是正眼。臨濟隨聲云。大悲千手眼。那箇是正眼。麻谷拽臨濟下禪床。遂自陞座。臨濟近前云。不審。麻谷擬議。却被臨濟拽下禪床。復陞座。良久云。久立尊官。伏惟珍重。師云。此是從上知識。陞堂底樣子。後人不明旨趣。一向語路推尋。往往將此公案。喚做照用同時。卷舒自在。恁麼商量。欲明千聖不傳之機。大似接竹竿打月。有甚交涉。殊不知。騎自馬捉賊。以自刀殺賊。即易。就賊馬捉賊。迴賊刀殺賊。即難。何也。如國家拜將。妙得其人。應機會間不容髮。方當用事之時。勢安龍蟠虎踞之利。陣結長蛇偃月之衡。擁百萬軍。決千里勝。人但見七擒八縱。萬舉萬全。而不見幃幄運籌。聲容不動。攬旗奪鼓之間。已蕩巢穴。棄甲曳兵而走。殲厥渠魁。經云。諸有智者。以譬喻得解。鬼方既定。神武不殺。班帥振旅。凱歌而還。時節因緣。眾所共知。臨濟麻谷一狀領過。且道。昔人今人。是同是別。若也定當得出。上無不報之恩。下有可行之道。還會麼。四海晏清歌有道。八方無事樂堯年。即將此日開堂妙善。謹進祝延 今上皇帝。聖筭無窮。恭願

今上皇帝陛下。道合乾坤。明逾日月。恩霑萬姓。俱為富壽之鄉。化被四夷。皆識詩書之訓。巍巍乎。蕩蕩乎。民無得而稱焉。但臣僧某。道行無取。短拙有餘。土木身心。煙雲蹤跡。本圖水邊林下。枕石眠雲。木食草衣。歌詠太平而已。不謂。遽承

睿旨。掃灑慧林。遂令枯木重芳。寒灰再焰。敢不力勤香火。策勵禪徒。共揚 西祖之風。上祝南山之壽。我 皇帝陛下。恭願。似天不老。萬靈永戴於無私。如日方中。一草不容於斜影 皇后。皇太子。諸王天眷。玉葉金枝。慶尚一人。咸臻五福。闔筵賢士大夫。共賜光臨。莊嚴法會。僧錄三藏。諸院禪師。四遠檀信。十方清眾。同歌舜日。共戴堯天。萬劫千生。常逢此會。久立眾慈。伏惟珍重。

上堂。舉金峰和尚示眾云。事存函蓋合。理應箭鋒拄。你若道得。分半院與你。時有僧出禮拜。金峰云。相見易得好。共住難為人。便下座。師云。金峰放處太輕。收來太重。慧林即不然。一切不見句。瞎却時人眼。你若道得。說什麼分半院。和鉢袋子。一時分付。良久云。何須尋白玉。只此是黃金。

上堂云。今年兩次逢端午。不須更打划船鼓。金剛門外笑呵呵。一夜通身汗如雨。汗如雨。不須言。犀牛扇子亦徒然。舊山多積雪。歸去是何年。

上堂云。古人道。說得一丈。不如行取一尺。說得一尺。不如行取一寸。說得一寸。不如行取一分。又有尊宿云。說取那行不得底。行取那說不得底。雖然恁麼。未免陪分疎在。且道。說不得底。如何行。語不傷人方出口。藥因有驗始傳人。

上堂云。一切有為法。如夢幻泡影。如露亦如電。應作如是觀。釋迦老子。只知其一。不知其二。幻化空身即法身。箇中無染亦無塵。拈匙把筋如明了。掃地燒香不倩人。

江寧府能仁。差僧賣疏帖。請詮首座出世。堅不肯受。師便鳴鼓先陞座。

僧問。獅子未出窟時如何。師云。怕人見爪牙。進云。出窟後如何。師云。頭尾不能藏。進云。恁麼則有意氣時添意氣。不風流處也風流。師云。打鼓大家看。師乃云。趙州住院二十年。折腳禪床欠一邊。灰頭土面半飢餓。苦澁家風今古傳。翻笑今人做長老。恰似官人問職田。職田多。我便去。免見鉢盂無著處。職田少。我不去。生怕沒鹽兼沒醋。禪門難得好兒孫。正眼近來如掃土。慧林首座久韜藏。箇中果熟自然香。大海釣魚[拏-厃+去]得失。空船歸去也無妨。

上堂。僧問。諸人知處。良遂盡知。良遂知處。諸人不知。未審如何是良遂知處。師云。一字兩頭垂。進云。若不同床臥。焉知被底穿。師云。承言須會宗。師乃云。一鉢迢迢歷數州。朱門白屋信緣求。如今蠶足歸來也。自在潯山一牯牛。恁麼會得。猶是油花脫子。未是到家一句。如何是到家一句。一條藜杖倚壁角。三乳芒鞋掛屋頭。

道友就資福。作蓮花會。供養羅漢。請師陞座。

僧問。紅輪出海。萬里光輝。寶鑑當臺。一方明曜。學人上來。請師一鑑。師云。迅雷不及掩耳。進云。一句流通。人皆聳聽。師云。馬無千里謾追風。進云。誰聞如是法。不發菩提心。師云。如何是菩提心。進云。南宗北祖皆如此。天上人間更問誰。師云。今日問話。有些巴鼻。進云。句句分明皆合道。家家門口透長安。師云。幸自可憐生。師乃云。拍手相逢笑不休。本來無證亦無修。人人盡是阿羅漢。何必天台鷹蕩求。還會麼。幡花影裏。菡萏香中。人人雪鬢霜鬚。箇箇雲蹤鶴態。也有凝眸看鶴。也有露齒吟經。也有百衲蒙頭。也有長眉蓋眼。也有降龍伏虎。也有相對清談。雖然種種不同。皆是神通遊戲。不見仰山和尚。一日坐次。有一羅漢。騰空而至。仰山問云。近離甚處。羅漢云西天。仰山云。幾時離彼。羅漢云。今日齋後。仰山云。何太遲生。羅漢云。遊山覩水。仰山云。神通遊戲。不無尊者。佛法須是老僧。羅漢云。特來東土禮文殊。此土元來有小釋迦。遂騰空而去。師云。仰山老子。尋常河口海口。疾焰過風。被他惡水。躉頭澆却。到底不知。當時若見他道此土元來。有小釋迦。便拽拄杖打出去。是則是。者棒放過也好。為什麼如此。時難只得同香火。莫與渠儂較短長。

解夏上堂。舉昔日有一老宿。一夏竝不為師僧說話。有僧自嘆云。我只恁麼。空過一夏。不敢望和尚說佛法。得聞正因兩字也得。老宿聞云。闍梨莫[斯/言]速。若論正因。一字也無。恁麼道了。扣齒云。適來不合恁麼道。隣壁有老宿。聞云。好一釜羹。被兩顆鼠糞污却。雪竇云。誰家鍋釜。無一兩顆。

師云。長夏無別趣。調和羹一釜。滋味頗馨香。剛地成點污。口是禍之門。舌是斬身斧。陪却三斤鐵。只因看錫鎔。忽然有箇衲僧。出來道。和尚也須照顧。慧林只向他道。死老鼠。

上堂。舉桐峰和尚。見僧入門。便舉起拂子。僧便禮拜。桐峰云。犬吠月。又僧到來。峰亦舉起拂子。僧禮拜。峰便打。

石樓和尚。見僧入來。便舉起拂子。僧便禮拜。樓云。如是如是。又僧入來。樓舉起拂子。僧禮拜。樓便打。

臨濟和尚見僧入來。便舉起拂子。僧便禮拜。際便打。又有一僧入來。際亦舉起拂子。僧禮拜。際亦打。師云。一人得自利三昧。一人得利他三昧。一人得自利利他三昧。明眼人試辨看。

上堂謝知事。慧林小院子。恰似一隻船。終日行上水。須得眾人牽。出入底出入。說禪底說禪。做飯底做飯。打眠底打眠。有時甜似蜜。有時苦如連。恁麼度眾生。笑倒老金僊。若問西來意。令人肚裏煎。因什麼肚裏煎。按盡牛頭不喫草。

洪州九仙山。請親長老。上堂。僧問。向上一路。千聖不傳。只如嗣法宗師。自何而得。師云。當暗中有明。進云。若不傳法。度眾生。畢竟無由報恩。師云。已落向下。進云。還許學人重添注腳也無。師云。已不少也。僧禮拜云。一片月生海。幾家人上樓。師乃云。滕王閣畔遙招手。汴水堤邊未點頭。要得錦鱗來上釣。大家撐動木蘭舟。且道。蘭舟如何撐。良久云。不犯清波意自殊。

師付法衣。拈起示眾云。以法傳心。以衣表信。黃梅山頭。白蓮峯頂。分付曹溪路上人。一模鑄就黃金印。何故須要者箇。師笑云。不借婆婆裙子繫。爭能隨地舞三臺。

當晚請九仙長老小參。

師云。今朝四月十五。已見炎炎酷暑。只宜搖扇飲水。豈可譚今引古。却請九仙長老。傾些清涼法雨。眾中釘觜禪和。便好出來進步。問教口似礮盤。始信長老難做。親長老自照顧。發機須是千鈞弩。

送九仙長老上堂云。慧林投老入紅塵。俯仰三年成蝶根。自笑欲歸歸未得。時時送客出都城。所以道。世事悠悠。不如山丘。青松散日。碧澗長流。山雲當幕。夜月為鉤。臥藤蘿下。塊石枕頭。飢渴渇飲渾無事。自在為山水牯牛。然雖如是。便恁麼去。有甚氣息。七凹八凸須拈出。捏六成三未可休。

上堂云。著黑衣。護黑柱。虎不食斑。惡傷其侶。云何獅子身中蟲。終朝返食獅子血。忍痛金毛不作聲。箇中滋味難分雪。從咬囁。願爾回光返照時。始信虛空無兩舌。

上堂。舉古靈和尚問僧。甚處來。僧云。城中來。靈云。還知你所生父母。在地獄中受苦麼。僧云。特地來看。靈云。汝如何看。僧哭蒼天蒼天。靈喝云。者裏是甚所在。要哭便哭。僧云。爭奈父母。在地獄中受苦。靈云。汝如何免得此難。僧云。三十年後。有人鑑此話在。

師云。古靈和尚向平地上陷人。爛泥裏著刺。者僧若是箇作家。纔見他道還知你所生父母。在地獄中受苦麼。便向他道。欲知旱海路。須問去來人。待者老和尚擬議。便與推倒禪床。只如今日了初侍者。追薦二親。試問諸人。且道他父母。在地獄中受苦耶。在人天受樂耶。若定當得。許你具一隻眼。若定當不得。帶累初侍者。入鑊湯爐炭。山僧為你誦箇破地獄偈。免見一向在鬼窟裏。做活計。下初死却爺共娘。二十餘年割不斷。今朝打破骨董箱。請我陞堂舉公案。

古靈平地起風波。瞌睡禪人不奈何。地獄天堂都莫問。大家隨例喫燠鵝。

檀越病起。請師陞堂云。佛病與祖病。眾生心上疑。情塵一念脫。消散如風吹。試問諸病源。起滅從何依。來從何所來。去向何所歸。若能直下見。苦痛無毫釐。不見維摩老。文殊問疾時。聚頭說藥方。夫却獅子兒。為什麼如此。不識西天漏藍子。幾人錯認作烏頭。

端午上堂。僧問。是草皆為藥。文殊強指南。箇中如不會。特地使人參。學人上來。乞師方便。師云。苦瓠連根苦。甜瓜徹蒂甜。進云。如是則相逢不拈出。舉意便知有。師云。知有底事作麼生。進云。爭奈入荒田不揀。信手拈來草。師云。何時出得荆棘林。進云。文殊公案。一筆勾下。只如盡大地是藥。那箇是自己。師云。退後退後。

僧問。句裏呈機問趙州。四門相對謾輕酬。學人未曉箇中意。乞師方便指來由。師云。大無外小無內。進云。如是。則問處不知玄妙旨。答時方見祖師心。師云。門裏出身易。身裏出門難。進云。爭奈不向語中求異見。爍迦羅眼絕纖埃。師云。猶未見趙州在。進云。多少隨言逐句人。門門便道無遮障。師云。蝦跳不出斗 師乃云。今日適當端午。便有僧問時節因緣。問頭不妨親切。進語中不解承當。山僧為諸人。重舉一遍。往昔文殊師利。為善財曰。為我採藥。不是藥者採將來。善財入山遍尋。無不是藥者。歸白文殊。山中無不是藥。文殊曰。是藥者採將來。善財拈一枝草。度與文殊。文殊接得。舉起云。此藥。亦能殺人。亦能活人。師云。者般道理。作者方知。若非鐵眼銅睛。往往當面蹉過。然雖如是。善財恁麼採藥。只知其一。文殊恁麼辯藥。不知其二。遂拈起拂子云。還識者箇藥麼。得者長生。服之不死。神農不知名。耆婆無處討。破除佛病祖病。掃蕩無明煩惱。物物頭頭不覆藏。靈光洞耀何人曉。

上堂云。天時有風雨晦明。人事有吉凶悔吝。如意事少。轉軼常多。自古而然。何足介意。此是世間俗人論議。靈山老道。過去事。如夢不可得。未來事。如電不可定。見在事。如雲彷彿而有。有此方便。能行人之不能行。忍人之不能忍。慧林為你諸人。添箇注脚。過去事如夢。了然無罅縫。要當做夢時。便作覺時用。未來事如電。有無不可見。莫將希望心。昧却娘生面。見在事如雲。目前彷彿有。安得東南風。吹散西山口。良久云。山僧為你。吹散了也。會麼。莫道無心便無事。也曾愁殺楚襄王。

上堂云。南來者。與他下載。北來者。與他上載。趙州和尚恁麼道。大似世情看冷暖。人義遂高低。山僧因一事長一智。南來者。與他一面笑。北來者。與他一面笑。笑裏亦無刀。笑裏亦無妙。且道。圖箇什麼。此事不愁怕爛了。賣者雖多買者少。慧林長老眼搭癡。誰敢按牛頭喫草。

上堂云。適來欽道者。領一童子。持數朵蓮花。入門便拜。山僧問。作什麼。道者云。請和尚陞堂說法。老僧喚行者。將蓮花。分作四瓶。裝却。道者罔措。你若薦得。何須特鳴法鼓。高踞猊臺。靈山正眼。一時分付了也。既不如是。不免重新舉箇公案。一則為郭氏拔罪根。破疑網。二則為道者。開一隻眼。不見昔日。僧問智門。蓮花未出水時如何。門云蓮花。僧云。出水後如何。門云。荷葉。

師云。智門是作家宗師。出語便斬釘截鐵。然雖如是。要且只解把定。不解放行。忽有人。問山僧。蓮花未出水時如何。煙籠檻外差差綠。出水後如何。風撼池中柄柄香。畢竟如何。多謝浣紗人不折。雨中留得蓋鴛鴦。

上堂云。十年做長老。今年闊吵吵。思量世間事。佛也不可曉。昨日買箇卦。卜道來年好。財帛星入門。虛耗鬼去了。知事與頭首。各著些孔竅。盛點兩甌茶。多陪一面笑。大家說些快活禪。免教拄杖生煩惱。

開寶仁王院大悲菩薩生日。三禪陞座。師當最後陞座。顧視大眾。遂舉右拳云。者箇便是八萬四千母陀羅臂。復舉左手。伸五指云。者箇便是八萬四千。清淨寶目。復微笑云。大悲時時降生。諸佛頭頭無間。者裏裂破面門。薦取通身手眼。便下座。沂州天寧專使。請長老。

師上堂。僧問。如何是臨際禪。師云。木馬痛加鞭。進云。如何是雲門禪。師云。虛空駕鐵船。進云。如何是曹洞禪。師云。團圓缺半邊。進云。如何是法眼禪。師云。紅錦蓋花氈。進云。如何是沩仰禪。師云。金針黑處穿。進云。五家宗派。蒙師指。向上宗乘事。若何。師云。是處井中有水。誰家竈裏無煙。進云。學人到者裏。理會和尚答話不得。師云。我也理會不得。僧禮拜。師云。問事即得。師乃云。時節因緣自有由。知音千里遠相求。寒山陌上纔招手。拾得溪邊已點頭。沂陽太守。墻塹真乘。千里移文。求人闕下。念禪門之衰颯。力與扶持。嗟祖道之荒涼。心存外護。況明公長老方當壯年。利生心急。便好橫擔拄杖。撩起布裙。且圖舊店新開。從聽時人買賣。不勞謙執。便請承當。然雖如是。且道。乘時一句。作麼生道。五葉花敷大地春。泥牛鞭起著精神。好將一葦堂前曲。舉向東州路上人。

上堂。僧問。百年暗室。一燈能破。如何是一燈。師便打。進云。如何是百年暗室。師云。撞著露柱。進云。恁麼則光明處處透也。師云。汝莫詐明頭。師乃云。昔日法眼。與悟空向火次。法眼拈起香匙。問悟空。不得喚作香匙。我道了也。你作麼生。悟空云。香匙。法眼不肯。悟空過二十餘日。方省此意。今時兄弟。問著便道。不可喚作火筋。又有底道。香匙只是香匙。又有底都不管。又有底道。和尚莫瞞人好

。又有底。向無交涉處。下一轉語。恁麼商量。有甚交涉。總不恁麼。又且如何。良久云。莫癲心。

上堂。舉杜順和尚有四句偈。流落叢林。自古及今。穿鑿不一。只為你不透祖師關。行處多荊棘。便被人向咽喉把定。出氣不得。慧林為你。除却有交涉底病。更除却無交涉底病。懷州牛喫禾。承言須會宗。益州馬腹脹。打著南邊動北邊。天下覓醫人。半夜放烏雞。灸豬左膊上。十謁朱門九不開。

上堂云。曉來雨過地無塵。綠暗紅疎爛漫春。拄杖花開人不會。等閑昧却本來身。昔日僧問忠國師。如何是本身盧舍那。國師云。與老僧過淨瓶來。僧取淨瓶至。國師云。却安舊處著。僧復問。如何是本身盧舍那。國師云。古佛過去久矣。

師云。日光月耀。不為盲者而不明。夏熱冬寒。豈為怨者而不作。直得淨裸裸赤灑灑。更無絲頭許遮藏處。尚自不會。豈況蓋覆將來。還會麼。良久云。古佛過去久矣。

旦日上堂云。春睡不知曉。覺來天已光。七條衣未著。五味粥先香。宰相鷄鳴起。凡夫徹夜忙。不知禪和子。將底報君王。

上堂云。曹溪路上。休要舉古論今。明眼人前。切忌談迷說悟。只合著衣喫飯。問訊和尚。更無禪道可商量。有底工夫求解脫。便恁麼信去。不妨慶快平生。其或擬議思量。未免落他階級。何謂也。小乘多話佛。老將不談兵。仲貽知閻。今辰生日。移飲酒食肉之會。作開單展鉢之緣。打動鹽官鼓。唱起德山歌。點趙州茶。做雲門餅。羅列如幻器具。供養影響禪和。以是無功之功。奉答劬勞之賜。慧林長老。不敢一一飾辭褒贊。恐染污諸人佛性。何以故。一切眾生。只認得箇父母所生之後。四大色身。却不知父母未生時。本來面目。又謂之七佛已前事。又謂之陰陽不到處。又謂之混沌未分時。又謂之空劫已前自己。記得古人生日詩一首。舉似大眾。他道。我昔未生時。冥冥無所知。天公強生我。生我復何為。無衣使我寒。無食使我飢。還汝天公我。還我未生時。者箇說話。好則甚好。猶欠衲僧孔竅在。老僧今日。為你諸人註破。我昔未生時。露柱懷胎。冥冥無所知。不唧[口\*留]漢。天公強生我。自是你把不定。生我復何為。爭怪得別人。無衣使我寒。猶有者箇在。無食使我飢。自有拈匙把筋底。還汝天公我。試拈出看。還我未生時。道什麼。

上堂云。白日人事勞攘。夜裏只了瞌睡。忘記安排說禪。且望諸人不罪。便下座。

上堂云。少室九年。垂一則語。直至而今。諸方賺舉。且道。那箇是當時垂底語。莫是將心來。與汝安底。是麼。莫是與汝安心竟底。是麼。莫是廓然無聖底。是麼。休將馬鞍橋。悞作爺下頷。天下老和尚。盡皆錯舉了也。山僧今日。為諸人。少救一半。免見後代兒孫。箇箇阿濂濂地。若要舉得不賺。各請回光自鑑。少林孤坐九年。直得口似樞擔。良久云。也只賺舉了也。

上堂云。念念常空寂。日用大有力。此是三世諸佛行履處。六代祖師行履處。無功之功。功不虛棄。雖然如是。也須打破虛空始得。

上堂。舉吾心似秋月。碧潭清皎潔。無物堪比倫。教我如何說。師云。寒山子說不得。即且止。諸人還說得麼。直須口似礪盤。方始光明透漏。

上堂云。千般說萬般喻。特地令人轉不悟。西風昨夜泄天機。鬱鬱黃花香滿路。

上堂云。欣逢誕聖時。無以報明主。唯憑一炷香。更擊三通鼓。唱起太平歌。共行向上路。且道。向上路作麼生行。太平歌作麼生唱。良久云。只願堯天日月長。待見黃河清萬度。

上堂。僧問。如何是無心法。師云。木人夜半將花搖。進云。如何是有心法。師云。豐樂樓前馬沓沓。師乃云。古人云。有時一喝。如金剛王寶劍。有時一喝。作踞地獅子。有時一喝。作探竿影草。有時一喝。不作一喝用。遂喝一聲。且道是金剛王寶劍。是踞地獅子。是探竿影草。是不作一喝用。良久云。落花春繡水。新月夜梳雲。

上堂。僧問。祖意西來即不問。開爐一句事如何。師云守定寒灰賺殺人。進云。恁麼則直須迸出熑燎炭。始見丹霞老作家。師云。惜取眉毛。師乃云。北風如箭射庭除。冷落禪門一物無。多謝諸人相暖熱。慇懃為我作開爐。富時得千兩金。未為奇特。冷處著一把火。始是相成。實際理地可張羅。佛事門前堪炙手。闊浩浩中。尋求却易。冷湫湫裏。摸索最難。直教枯木再生花。任是寒灰重放焰。然雖如是。且道。超時越節一句。作麼生道。良久云。到頭霜夜月。任運落前溪。

上堂云。老僧來慧林。四見書雲節。不解巧逢迎。豈敢多饒舌。瞋即聽你瞋。拙即從我拙。要透祖師關。放教心地歇。若不歇。臘月三十日。一時都敗闕。

上堂云。十年持釣在江湖。翦笠蓑衣只自如。忽爾竿頭浮子動。等閒釣得一頭魚。召大眾云。且道。是什麼魚。還識麼。莫問竿頭輕與重。且圖江上不空歸。

敘事畢。師復云。慧林鐵饅頭。做來年已久。不是不拈出。自是人不受。覲著齒牙寒。咬著眉頭皺。不是張鵬舉。誰人敢下口。咬即任咬。且道。是何滋味。良久云。泥牛背上駆紅日。石女脣前掛玉環。

上堂。舉僧問曹山。抱璞投師。乞師雕琢。山云。不雕琢。僧云。為什麼不雕琢。山云。須信曹山好手。

師云。曹山老子。辜負者僧。既言不雕琢。說什麼好手。忽有人。問慧林。為什麼不雕琢。只向他道。只恐不是玉。是玉且囊藏。頓在壁角裏。他年自放光。

上堂云。祖師正令。水泄不通。隨順機緣。副箇程限。譬如鑄金為人。但觀其人。不觀其金。其名也迷。其相也惑。所以然者。皆失其真。目前燈籠露柱。淨瓶香爐。門窓戶牖。皆是名相。那箇是真。還委悉麼。擔折始知柴束重。潭深方覺約絲長。

上堂云。祖師妙訣。頭頭漏泄。眾生日用不知。只管強生分別。豈不見。靈雲陌上桃花。趙州指出庭前栢。別別。正似紅爐一點雪。

上堂云。直饒一問一答。似獅子翻身。或縱或奪。如象王蹴踏。恣懸河之辯論。奮齧鏃之迅機。正眼觀來。未有事在。況法無別法。心即此心。凡聖同源。迷悟一致。所以道。無邊剎境。自他不隔於毫端。十世古今。始終不離於當念。如是則燈籠露柱。皆可傳心。拄杖禪床。時時出世。塵塵爾。念念爾。剎剎爾。昔日僧問長沙和尚。如何是無情說法。沙指東邊露柱云。者箇能說。僧云。未審何人解聽。沙指西邊露柱云。者箇能聽。僧云。和尚還聞麼。沙云。我若聞教誰舉話。師云。東邊露柱說。還有口麼。西邊露柱聽。還有耳麼。靈利漢。便好薦取。

上堂。舉僧問雪峰。聲聞人見性。如夜見月。菩薩人見性。如晝見日。未審和尚見性如何。峯打三下。

僧又問巖頭。頭打三掌。

師云。者兩箇老漢。纔被人問著。便手忙腳亂。忽有人。問老僧。和尚見性如何。也不掌他。也不打他。只向他道。慧林四十八。一毛不肯拔。口裏說慈悲。觸著便惡發。你若會得。不妨快活。

上堂云。若論此事。譬如大城。外有四門。隨方來者。非止一路。師遂垂下一足。又以拂子。擊禪床數下云。諸人從那箇門裏入。良久云。前不到村。後不到店。

上堂云。夜來看上元。一覺到天曉。紙被暖如春。被底呵呵笑。且道。笑箇什麼。你正忙時我正眠。

上堂。舉僧問曹山。魯祖面壁。當表何事。山以手掩耳。師云。古人大似怕人道著。

祈雨上堂云。寒食清明都過了。野桃紅杏已凋零。多時不聽簷頭雨。特地令人憶鏡清。一時念龍自在王菩薩。

上堂云。十方同聚會。箇箇學無為。此是選佛場。心空及第歸。鎮江周子厚。及第了也。因甚却歸不得。良久云。楊子江頭春柳綠。也應為汝起悲風。子厚將仕。平生勤苦。志在青雲。纔得登科。俄沈大夜。修崇用資冥路。願公悟死生如夢幻。了恩愛若空花。脫離凡緣。超登彼岸。諸人還會麼。石火光中高及第。南柯夢裏總無真。綠袍槐簡些兒物。賺殺閻浮多少人。

上堂。舉世尊一日陞座。文殊白槌云。諦觀法王法。法王法如是。世尊便下座。師云。樵甕打著連底凍。

結夏上堂云。四海五湖人。慧林同禁足。譬如學牧牛。身心要淳熟。常耕自己田。莫犯他人穀。一句若參差。九旬何面目。豈不見道。道人優曇花。迢迢遠山綠。

上堂云。萬法是心光。諸緣唯性曉。衲僧恁麼會。鑽頭入荒草。且道。出草一句。作麼生道。你既無心我也休。

上堂。舉有僧在長沙院側住菴。自云。見南泉來。長沙岑和尚遣僧問。未見南泉時如何。菴主默然據坐。又問。畢竟如何。菴主云。不可別有也。長沙聞得。有偈云。百尺竿頭坐底人。雖然得入未為真。百尺竿頭須進步。十方世界是全身。僧便問。百尺竿頭。如何進步。沙云。朗州山澧州水。僧云。請師實道。沙云。四海五湖王化裏。師云。岑大蟲。若無後語。也是百尺竿頭坐底人。

上堂云。古人道。上來打箇問訊。日消萬兩黃金。下去打箇珍重。受得四天下人供養。

師云。古人恁麼道。大似高價相酬。致令學者。一向作殊勝會了。慈受道。上來打箇問訊。且喜道體輕安。下去打箇珍重。秋來少契冷水。者裏忽然瞥地。莫道慧林瞞你。

上堂。舉地藏和尚云。地藏家風。無些巴鼻。土面灰頭。冷湫湫地。

師云。古人恁麼道。也是黑牛臥死水。慧林家風。有些巴鼻。下得床來。闊浩浩地。且道。闊浩浩地好。冷湫湫地好。你愛其羊。我愛其禮。便下座。

上堂云。身心一如。身外無餘。便恁麼會。緣木求魚。豈不見道。如驢覲井。何似如井覲驢。

旦日上堂云。寒來共向無煙火。飯了同烹雪色茶。飽食高眠無一事。不知何以報官家。

壽春府檀越。就天清寺。散千僧汗衫。請陞座。師云。壞生袴子。脫體皆空。趙州布衫。更無[打-丁+秉]度。袖頭打領。腋下剜襟。自然縫罅難尋。直是針鋒不露。然雖如是。說食終不飽。著衣方免寒。爭似者箇衫子。是檀越段時升。向清淨心中。流出布施。諸人正當恁麼時。一句作麼生道。良久云。一片信心清似水。滿天和氣暖如春。師復說偈云。布施門開非一朝。雲山千里肯辭勞。塵中欲聽無生曲。座上先橫智慧刀。貼肉汗衫容易施。有心道者却難消。願公福似鄱臺塔。一層高了一層高。

上堂云。盛暑隆寒相繼來。慧林四見地爐開。衲僧向火知方便。切忌團圓守死灰。恁麼恁麼即易。不恁麼不恁麼却難。直教枯木再生花。任是寒灰重起焰。

昔日雪峰開爐次。為學者云。三世諸佛。向火焰裏。轉大法輪。雲門云。火焰為三世諸佛說法。三世諸佛立地聽。

師云。奇特不妨奇特。且道。火焰如何說法。三世諸佛如何聞。若是頂目之流。舉著便知。晚學初機。老僧更為你添箇註脚。火焰時時轉法輪。廣長舌相耀乾坤。衲僧不會轉身句。爍破壞生舊面門。

上堂云。水中鹽味。色裏膠青。決定是有。不見其形。舉起拂子云。傅大士。即今在慧林拂子頭上。諸人還見麼。遂擊禪床一下云。人從橋上過。橋流水不流。

上堂云。炭頭今日地爐開。澁雨慳風惱破懷。老僧向火喫酸棗。誰管檀那來不來。

靖康改元。十一月。因率金銀。上堂云。乾坤之內。宇宙之間。中有一寶。秘在形山。

師云。汝等諸人者。一寶秘在形山久矣。夜來對人天眾前。各各拈出。直得熒煌燦爛。耀古騰今。與國家為瑞為祥。與群生為安為樂。自然干戈永息。悔吝不生。雨順風調。純樂堯舜之道。只如堯舜之道。作麼生樂。此身定向林間老。心與長松片石期。

上元日上堂云。皓月團圓照碧天。鰲山燈火不須然。吾皇恭儉人心樂。自有歎聲四海傳。

上堂。舉法眼云。時憶在山日。枕上聽瀑布。如今城裏居。欲去不得去。欲去既不得。住且還無慮。晨昏鐘鼓鳴。實堪揚佛事。

大覺璉禪師云。時憶在山日。雲泉曠野情。如今居輦寺。終日厭逢迎。禁近傳寒漏。堂空聽曉更。憑何通一線。庭栢向春榮。

師云。者兩箇漢。出處雖異。病痛一般。早知今日事。悔不慎當初。山僧道。憶昔在山日。眠雲并枕石。如今城裏居。欲去去不得。欲去既肚裏空啾唧。休啾唧。更聽籬頭吹筆策。

二月初一日。上堂云。日暖旌旗壯鳳城。聖君勤儉古風清。寶刀不染匈奴血。四海從今自太平。

在明禧陞座云。順天門外古招提。爛漫春光照錦溪。物物更無心外法。箇中能有幾人知。忽然杏花崗畔。白板橋頭。逢人作麼生舉。師撫掌笑云。莫道無人好。

師於三月二十六日。求退。在水門外東園。候旨至。四月初五日。奉朝旨。再住歸院。

上堂。問答不錄。師云。牽率歸來口懶開。婆娑重陟舊貌臺。孤雲本是無心物。又被東風拘管來。一搥便成。方是作家手段。千割不斷。欠他粥飯因緣。不如隨例納些些。況是從來活鱗鱗。喚作隨波逐浪。亦名和光同塵。三世諸佛。分雪無門。六代祖師。鉗口有分。正當恁麼時。動靜不分一句。作麼生道。有緣不是予朋友。無用雙眉却弟兄。

師復云。山僧一毫無取。百事荒唐。掃洒慧林。倏忽六載。本欲退歸巖谷。以盡殘齡。豈謂朝廷。不容引去。不免移身換步。委順世緣。再入門來。不勝勉強。伏蒙兩街僧錄。諸院禪師。遠出都門。良勤象駕。諸官員。道友。出門相接。曲盡勤誠。其在山懷。言不能及。古來尊宿。無住持事。船子和尚。在孤舟上接物。鳥窠禪師。於樹尾間為人。官府不知名。利害不到耳。處深山窮谷。木食草衣。一味與黃面禪和子。說硬曝曝地禪。行實逼逼地事。如今做長老者。名籍有司。恰如做官相似。身不自如。要去不得去。只為入他塵勞深也。然雖如是。衲僧到者裏。却須知有放行中把定。把定中放行。還會麼。聽取山僧一偈。朝廷未許老僧閑。且把西來向上關。莫

道禪門無致仕。更成半考便歸山。

上堂云。夜來春睡爛如泥。禁漏聲殘總不知。飜憶南泉好言語。如斯癡鈍也還稀。且道。承誰恩力。恁麼無事。得恁麼自如。還會麼。掃地煎茶歌舜日。訶佛罵祖樂堯年。

結夏上堂云。不唯禁足。亦乃禁口。不唯禁口。亦乃禁手。不唯禁手。亦乃禁心。禁心不禁口。日日嫌佛醜。禁口不禁手。累及眉頭皺。禁手不禁心。罪過轉彌深。禁足更禁口。蟻子銜椀走。禁口更禁手。垂楊生左肘。禁手更禁心。大地是黃金。要得一夏安樂。細看兩重註腳。山僧恁麼說話。大似不龜手之藥。

上堂。良久云。相逢不下馬。各自有前程。便下座。

上堂。舉藥山久不上堂。知事白云。大眾久思示誨。山云。槌鐘著。眾方集。山便閉却門。知事再白云。既許為大眾說法。因何一言不措。山云。經有經師。論有論師。律有律師。爭怪得老僧。

師云。藥山將真珠作豌豆糴。尚無人著價。

後來明覺和尚道。可惜藥山老漢。平地喫撲。盡大地人扶不起。

師云。慧林昨日也喫一撲。直得飲氣吞聲。迴避不及。既無人相扶。不免自倒自起。諸人還會麼。明珠一顆價難酬。不是知音便暗投。飜笑藥山空費力。水清魚現不吞鉤。

上堂。舉教中道。五十餘年。未嘗向人說如此事。師云。釋迦老子。大似貧兒思舊債。年老覺心孤。

諸道友相別。上堂云。相送無言淚滿巾。溪頭黃葉正紛紛。勸君更進一盃酒。西出陽關無故人。只如者一盃酒。如何進。卓拄杖一下云。一口吸盡西江水。不知何地著離情。

師於七月二十八日。得旨辭眾。上堂。

僧問。聲飛四海德如淵。唱道都城恰六年。世事悠悠乞歸去。白雲深處不朝天。布袋已開頭。船子便解纜。正當恁麼時。如何說得箇去去。實不去底道理。師云。如劍揮空。進云。恁麼則好水好山應有待。如雲如鶴任高飛。師云。猶涉動靜在。進云。爭奈楚天渾似客情遠。秋色不如歸興濃。師云。臨行之際莫忉忉。進云。千山不礙金剛眼。自然到處得逢師。師云。不要忘却。

僧問。象駕東歸正作秋。水光山色共悠悠。人天普集忻相送。一句臨風作麼酬。師云。處處無蹤跡。進云。如是則隨方施法雨。是處布慈雲。師云。為人傾盡一生心。進云。直得夷門山畔月。夜夜照慈航。師云。更須截斷兩頭。師顧視四眾云。六年掃洒皇家寺。一日君恩得遊還。拄杖重挑舊瓶鉢。者回信脚入青山。只如臨岐一句。作麼生道。良久云。得意濃時便好休。下座。

# 慈受深和尚廣錄卷第一

門人慈覺大師 文剛 勸緣

## 慈受深和尚廣錄卷第二

### 東京慧林禪寺慈受深和尚偈讚

侍者 普紹 編

### 前住焦山歷代尊宿真讚

#### 珍禪師

末上開山師最勞。栽松種竹意何高。舟橫斷岸無人識。幾度因風弄海濤。

#### 倫禪師

一著天衣無縫襖。平常語話暖如春。山蔬紙帳家風在。誰是當年聽法人。

#### 佛印禪師

水飜千偈亦輕酬。一笑甌峯萬事休。今古碧桃灣底路。幾多風月屬漁舟。

#### 深禪師

南山拾得劫初鈴。鄉曲誰人會此聲。撥轉海門關捩子。雲樓月殿一時成。

#### 從禪師

雪眉嵒頂鶴精神。淡薄家風世少鄰。明月蘆花藏不得。老來重跨鐵麒麟。

#### 慈受和尚自讚

因風便作海門居。釣盡波瀾未見魚。水冷雲寒歸未得。笑看新月上珊瑚。

### 前住慧林歷代禪師真讚

#### 圓照法空禪師

大圓鏡中。真光明炬。慈中有威。擊塗毒鼓。威中有慈。闢荊棘路。無緣飭。沒遮護。一切眾生。覩相而悟。

#### 覺海冲禪師

言簡理直。道高德重。無妄談笑。無妄迎送。衲子入門。毛髮聳動。密密處。莫能觀。倚天靈刃照人寒。

#### 佛陀遜禪師

轉方作圓。輝今耀昔。龍袖三關。金鎰一擊。五十餘年。脇不至席。逆鱗句。阿誰識。生死觀來如戲劇。

#### 佛光正禪師

烜赫佛光。逆順無礙。道傳崑山。聲飛湖海。戲笑怒罵。皆師三昧。風流處。更尤佳。曾悟庭前柏。春風二月花。

#### 祖印悟禪師

師道平夷。師貌渾厚。持如地心。開無妄口。四坐道場。一塵不受。節角處。沒窠臼。三眼神龜火裏走。

## 月印禪師

凜然孤風。粲然眉目。利劍當門。誰敢輕觸。脫略處。妙難傳。萬仞峯前駕鐵船

。

## 退步

萬事無如退步人。摩頭至踵自觀身。只因吹滅心頭火。不見從前肚裏瞋。  
萬事無如退步人。孤雲野鶴自由身。松門十里時來往。笑揖峯頭月一輪。  
萬事無如退步人。淡中滋味最天真。爐邊向火慵開口。睡裏抓頭忘却身。  
萬事無如退步休。百年浮幻水中漚。趙州不為爭餽餅。要得時人劣處求。  
萬事無如退步休。本來無證亦無修。明窓高挂多留月。黃菊深裁盛得秋。  
萬事無如退步休。華言巧語誑時流。世間種種皆兒戲。何必區區弄筆頭。  
萬事無如退步行。世間名利兩重坑。前頭光景無多子。莫與扶屍鬼子爭。  
萬事無如退步居。青山僻處結茅廬。聽他人笑生涯拙。自喜閑身得自如。  
萬事無如退步看。箇中生死不相干。兜兜坦坦從他做。兀兀癡癡我自安。  
萬事無如退步僧。髮長懶劄貌稜層。出言吐氣多山野。逆耳之談誰肯聽。  
萬事無如退步眠。放教癡鈍却安然。漆因有用遭人割。膏為能明徹夜煎。  
萬事無如退步眠。松床紙帳暖如氈。夢中說話無花草。況是山僧不會禪。

## 省緣

學道先須要省緣。莫教到被世情牽。二時但得鉢盂濕。囊底何妨無一錢。  
學道先須要省緣。隨時過得莫憂煎。無求坐臥常安樂。有意身心不坦然。  
學道先須要省緣。省緣一法最安然。有來有往有違順。無往無來無過愆。  
學道先須要省緣。他人長短莫喧傳。禍門不閉終無益。參取維摩老子禪。  
學道先須要省緣。莫教到被世情牽。牽來牽去無休日。直到閻羅老子前。  
學道先須要省緣。浮生傀儡暗抽牽。機關用盡成何事。贏得三塗鬼火煎。

## 念彌陀頌

萬人同志念彌陀。眾力相成願力多。一朵蓮開親見佛。方知淨土勝娑婆。  
樹林水鳥各宣揚。寶網金臺盡道場。會得鐘鳴并鼓響。彌陀觸處現毫光。  
鬢髮看看染雪霜。心猿意馬尚顛狂。一朝掩目空歸去。始信泥犁歲月長。  
業報差殊事不同。勞生何地出樊籠。欲知自性彌陀佛。在汝朝昏一念中。  
眾生苦海業坑深。不信因緣久溺沉。聞得又聲方念佛。始知妻子老婆心。  
不是山僧說是非。修行魔事要君知。直須緊峭草鞋底。透過娑婆五欲池。

## 家中四威儀

家中行。尋常違順不須爭。若知步步無階級。何必蓮華脚下生。  
家中住。早起開門夜閉戶。運水般柴莫情人。方知佛是凡夫做。  
家中坐。一室寥寥是什麼。靈光一點甚分明。何必青山尋達磨。  
家中臥。展腳縮腳皆由我。若能一覺到天明。始信參禪輸懶墮。

## 貪

學道先須不要貪。貪心障道使人凡。祖師一味無求法。流落人間誰肯參。

## 瞋

學道先須不要瞋。瞋心未斷道休論。諸佛常說瞋如火。燒却菩提種子根。

## 癡

學道先須不要癡。癡心未了轉狐疑。迷雲頭上黑如墨。白日茫茫幾箇知。

## 枯骨頌

風力機關終有盡。深情厚貌見無因。擔擎黑業歸何處。留得枯骸未化塵。  
皮包血肉骨纏筋。顛倒凡夫認作身。到此始知非是我。從前金玉付何人。  
鳥啄鴟[音\*鳥]皮肉盡。風吹日炙髑髏乾。目前試問傍觀者。自把形骸檢點看。  
因瞋久戀四蛇窟。由愛長依六賊村。今日并贓都捉敗。這回休要弄精魂。  
百骸漬散雜塵泥。一物長靈復是誰。不得丹霞通一線。髑髏著地幾人知。

## 枯體。酒色財氣頌

枯體愛酒醉魂在。羅列盃盤手自斟。酩酊一生心似麴。想君作鬼也昏沉。  
燕脂畫面嬌千樣。龍麝薰衣峭百般。今日風流都不見。綠楊芳草髑髏寒。  
生前財貨因貪得。死後形骸被物拘。畢竟一文將不去。被人罵作守錢奴。  
偶然一語不相投。努目揮拳汗欲流。若悟形骸同逆旅。胸中人我一時休。

## 天人禮枯骨

汝是前身我。我今天眼開。寶衣隨念至。玉食自然來。謝汝昔勤苦。令吾今快哉。  
散花時再拜。人世莫驚猜。

## 餓鬼打死屍

因這臭皮囊。波波劫劫忙。只知貪快樂。不肯暫迴光。白業錙銖少。黃泉歲月長。  
直須痛棒打。此恨卒難忘。

## 沙門破二見

咄咄愚癡子。云何不自觀。鞭屍真倒置。禮骨自欺瞞。善惡由心造。佛魔著眼看。  
踏翻煩惱海。生死不相干。

## 資福遣土地出院

汝為神道合威靈。酒肉如何順世情。小鬼判官都出院。禪門法令要分明。  
村歌社舞拜祠堂。臭穢腥羶污道場。要答神明冥護力。晨昏燒取一爐香。  
若將酒肉污伽藍。因果分明語再三。說著人情都不順。山僧到此口難緘。

## 靈巖披雲臺十頌

林底常懷老藥山。皮膚脫盡萬機閑。披雲月下時長歎。千古風流滿世間。  
戲鐫崖石號披雲。且欲朝昏見古人。折脚鐺中聊自足。世間憂喜不關身。  
拄筇臺畔自騰騰。野草閑花照眼明。綠水青山皆舊物。鳥啼猿笑別無聲。  
春暖巖花處處紅。住山境界樂無窮。勞生奔競何時已。說與還如耳畔風。  
當年吳越日相攻。蟻鬪蠅爭不少容。范蠡西施伎倆盡。青山依舊白雲中。  
兀坐雲根懶舉頭。更無言句示禪流。森羅萬象分明說。有口何妨挂壁休。  
老來羞懶出人前。只欲隈巖傍水邊。多謝洞庭峯頂月。夜來向我十分圓。  
禪門難得好兒孫。逐句尋言總失真。山是山兮水是水。莫將情解鬪尖新。  
透過無心種種休。松間石上自悠悠。田園不用爭疆界。大地都來一指頭。  
莫笑山僧語句癡。真情何處著工夫。世人用盡精神討。緣木何曾覓得魚。

## 和堯峯泉老

### 清輝軒

湛湛平湖漫月明。漁歌聲斷曉風清。壞衣蒙頂跏趺坐。不稱詩情稱道情。

### 碧玉沼

深靜含秋一鑑寬。清甘聊酌齒牙寒。靈巖自笑荒山骨。明月泉樞祇欲乾。

### 多境巖

聊向蒼藤挂六環。滿前嘉致屬幽閑。雙眸淨洗看無厭。欲結遮頭草一間。

### 寶雲井

寶雲誅草廣禪林。鑿石窮源意亦深。長嘆甘泉不當路。汪汪空有濟人心。

### 白龍洞

古洞深沉莫敢窺。森陰草木野雲飛。白龍何處淹頭角。天下蒼生望汝歸。

### 觀音巖

笑日野花青嶂下。歌春幽鳥白雲間。寶陀大士全身露。懊惱游人空看山。

### 妙高峯

下視群山盡子孫。孤高直與月輪分。善財不用別峯覓。只此休時見德雲。

### 偃蓋松

寒松門底如張蓋。招引嘉賓眼倍青。方丈老人迎送少。未應因汝下幽庭。

## 東齋

禪板蒲團消永日。明窓淨几映踈筠。一鑪香盡六時過。轉覺山家氣味真。

## 西隱

匿影長嫌山未深。閉門莫放俗塵侵。如今滿眼事奔走。欲對何人話此心。

## 余結茆西山。終日無事。因作洞庭十二偈。以彰眾生日用不知之道。趙州云。時人被十二時使。老僧使得十二時。斯言最切。人莫曉焉

鷄鳴丑。一聲喚起菴中叟。披衣踏月聽松風。人間萬事慵開口。

平旦寅。疊疊湖山觸目真。箇中更擬論玄妙。七十二峯應笑人。

日出卯。參禪切忌生機巧。近來衲子學虛頭。未曾喫飯先言飽。

食時辰。粥飯精麤養病身。落蘇苦蕡今年少。誰念庵中瘦損人。

禺中巳。樵夫來說人間事。六月江頭兵未休。盡向眾生心上起。

日南午。瓦鑪石銚閑家具。拾薪吹火自煎茶。笑與兒童相爾汝。

日昳未。撩起布裙閑掃地。庵舍荒涼無客來。門前黃犬因何吠。

晡時申。自笑平生懶是真。白髮蒼顏陪奉少。聽渠歡喜聽渠瞋。

日入酉。光境前頭豈長久。更無佛法可商量。聽他衲子交橫走。

黃昏戌。有口何妨長挂壁。半簾秋色卷西風。一點青燈照茆室。

人定亥。住山自有家風在。老來落得放心眠。人生莫被閑名礙。

夜半子。紙帳松床睡方美。翻身不覺念勞生。幾箇不遭心識使。

## 題杭州西湖可堂

避喧求靜到湖山。却被湖山不放閑。踏破草鞋遊未遍。便甘投老兩山間。

喜見君心有歲寒。閉門終日對琅玕。相逢不具香嚴眼。祇作敲風帶雨看。

## 題石橋

衝寒得得到天台。不為青山綠水來。自愧過橋無脚力。却欣供聖有茶杯。蒼崖瀑瀉銀河闊。方廣雲收金殿開。問訊彌眉老尊者。也須回首入塵埃。

## 題白道猷

猛虎毒蛇從法化。凶神百恠仰高蹤。只因一念分凡聖。礙却前頭蒸餅峯。

## 題呂城接待院

我來暫解包。困就長床歇。叮嚀木上座。莫苦多饒舌。一身同逆旅。三界若空花。勉爾水雲客。當求見作家。

## 初至包山大雪。戲題

老僧昨夜包山宿。茅屋青燈火滿爐。料得山神心喜我。曉來巖樹雪模糊。

### 次日有鵲。巢於庵前棗樹上。樹高數尺。因筆戲題

鵲巢低樹絕驚猜。可驗庵僧心已灰。與汝林間緘口過。不須虛喜報人來。

### 栽松

栽松須覓曲松栽。養就山林擁腫材。直是無人著眼看。歲寒方得老巖偎。

### 手植小松

小松盈尺已凌雲。肯學芬芳桃李春。想汝龍鱗合抱日。老僧應是再來人。

### 題一笑庵

旋縛茅茨蔽雨風。土床蒲薦自雍容。榮枯過眼人間事。盡付山僧一笑中。

老覺形骸漸漸衰。放懷終日眼如眉。畏人知處閑名出。猶喜歸庵未甚遲。

### 題也休庵

曲木為庵土作床。有門不閉且無妨。時人莫笑家風拙。歇得心時事事忘。

唱歌樓上語風流。你既無心我也休。打著郎君心裏事。從前恩愛冷啾啾。

### 睡起戲題

喫粥喫飯過。聽風聽雨眠。莫將安樂法。容易與人傳。

### 題寒食花

寒食花無數。寂寥草莽同。只因顏色少。留得老山中。

少艷人稀賞。無香蝶不知。人心尚紅紫。爭看醉西施。

### 題紙襖

新成紙襖著彭亨。掉臂何妨雪裏行。我既不怜人不愛。世間從此免相爭。

### 師初到包山。見小池。瑩如水玉。父老云。池中昔有白龜。已進之。因

### 命為白龜泉

任是流金鑠石時。此泉澄湛滿幽池。白龜聞已獻天子。何似蹣跚在淤泥。

### 題隱泉

泉隱甘無竭。人閑道轉高。涓涓清自足。休苦作波濤。

### 包山開井

山骨鑿深六十尺。石中泉眼始方開。後人飲水知來處。曾費山僧心力來。

### 小師船埠造塔

傴僂山頭自負埠。要成小塔立雲煙。聚沙也似兒童戲。且為湖山結少緣。

### 入定觀音

那伽常在定。無有不定時。為彼散亂人。故現如是相。

### 廣瑞巖和尚呼主人公諾

主人公諾聽我語。死生流轉無停住。今日忙兮明日忙。靈光一點何時悟。  
主人公諾聽我道。貪名逐利何時了。爭如識取自家珍。靈光灼灼無邊表。  
主人公諾聽我勸。浮生莫作欺瞞漢。暗裏雖然瞞得來。明中依舊還消散。  
主人公諾聽我說。百歲光陰如電掣。四十五十不回頭。問君更待何時節。  
主人公諾聽我囑。今年已是五十六。為人終是費分疎。何日口邊生白醭。

### 勸食素

喫肉何如咬菜根。且圖身口戒香薰。莫言死後無因果。八兩須還他半斤。

### 勸農朝食素

未能遽斷葷和酒。且結晨朝清淨因。省費省緣兼惜福。靈巖此語太饒人。

### 懷淨照禪師

一別蘆江後。千峯鴈影沉。聞迴天子詔。方見老師心。籌室應將滿。禪關轉見深。  
秋來甌頂夜。時復夢投針。

### 閱佛鑑禪師語錄

說禪要似鍾山老。有口無心幾箇知。要我舌端轟霹靂。就渠眼裏下鉗鎗。平時却出活人劖。險處聊為死馬醫。慚愧叢林宗匠在。與人掃盡百生疑。

### 乞退慧林。寄佛果禪師

單絲繫住老牛腳。心欲東西未自由。憑仗東風齊著力。早教舡子下楊州。

### 寄壽春沂和尚

聞把東禪木杓柄。放開布袋好流傳。後人薄己符言行。壁立家風要斬然。

### 答天寧訥和尚

老來多睡勝春蚕。五蘊山頭卓箇菴。隨分飢渴飲過。不知何地見同參。

### 寄東禪昭和尚

聞坐天童上板頭。深挑痛箇未應休。吾門直截無窠臼。家破人亡始自由。

### 答廣燈禪師退翠峯

有經遮眼明窻下。無事干懷白晝長。自拾松枝燒歛鉢。看人終日競頭忙。

### 送慶善珪和尚

道人門冷如秋色。竟日曾無俗駕來。近為耽詩成癖好。寒窓夜作老猿哀。

### 中秋寄瓊和尚

秀嶺高峯咫尺間。青松常伴白雲閑。中秋同翫洞庭月。誰道山家不往還。

## 和規和尚

老來心地爛如泥。卜得胥湖作虎溪。七十二峯煙浪闊。聽他游子路頭迷。  
去年西塢得相尋。雪竹霜松一徑深。圓屋青燈聞妙語。使人灰盡一生心。  
但得茅簷春睡足。何須石室較籌盈。遙知別後多蕭散。坐聽松風萬壑清。  
鏡像魔軍方滿目。浮雲世事急抽頭。倚蒲癡坐慵開口。詩債還能饒我不。

## 和信和尚

一身彼此轉蓬樣。百歲光陰交臂間。底事石梁成邂逅。烽煙影裏得餘閑。  
喜君胸次冰壺淨。道富身貧只我諳。利火名湯方鼎沸。看人終日手爭探。

## 示高維那。兼簡寶華鑑和尚初出世

石上三生夢已非。人間萬事眼如眉。歸家更問寶華老。何似板頭端坐時。

## 會源首座

高蹤不負當年約。時憶翻然命駕來。世味任教甜似蜜。道心終使冷如灰。茅茨款我三椽小。石榻緣君一笑開。倚杖春風話平昔。寄言猿鳥莫驚猜。

## 會吉上人

晚歲欣逢彼上人。誅茅約我老江濱。世間聲利空翻覆。林底交游無故新。學力幾年淹講席。真風一掃盡情塵。近來百鳥無尋處。開盡巖花爛熳春。

## 示純禪者

故園我別已多時。見子猶能略展眉。鄉語每聞聊發笑。客情無復更生悲。尋師慎勿貪眠食。立雪終教徹髓皮。畢竟禪家外文字。之乎者也不須知。

## 示敏禪者

尋師問道豈徒然。休似癡夫飽睡眠。白日西傾如箭息。紅顏暗去若繩牽。斷肱立雪思吾祖。刺股懸頭倣昔賢。此語叮嚀須記取。莫教容易過流年。

## 示曇禪者

數椽茅屋海門邊。雲水生涯祇任緣。逸足懶收支遁馬。清香聊種遠公蓮。欲干世上千鍾祿。何似林間一覺眠。異日果來期款曲。為君芥子納三千。

## 示求禪者

靈光一點自分明。照破眾生違順情。拶看通身開正眼。方能日午打三更。

## 示裏禪者

古人得後便休休。茆屋青燈百不求。遮眼謾將黃卷展。不風流處却風流。

## 示表禪者

放下千斤重擔子。重歸巖谷舊三椽。不須苦覓楊州鶴。伴我林間骨硯眠。

## 示皎禪者

世事不中迴首看。湖山他日為吾來。草衣木食相陪過。肯把柴門取次開。  
**僧道成。於金山住。破屋一間。有不下山戒。喜其孤潔。贈之以偈**  
歇得心時自少魔。山頭孤坐養天和。莫嫌茅舍不寬廣。茅舍纔寬事便多。

## 安正闡梨求偈

黃葉止啼知即已。敲門瓦子亦休留。虛空講得真經後。解笑當年石點頭。

## 因首座求偈

衣底明珠本自圓。箇中無正亦無偏。蒲團紙帳坐終日。體取先師苦口禪。

## 至禪者求偈

探竿影草閑家具。獨弄單拈破笊籬。口醭心灰諸漏盡。菱花不拭自光輝。  
玉偈金言一掃休。己靈不重聖何求。無常煞鬼難吞處。祇為渠儂得自由。

## 道智更衣參學。求偈

未見虛空解講經。箇中切忌計工程。蒲團七箇坐不破。豈可等閑明死生。  
妙句玄言一切休。只看露地一頭牛。忽然鼻孔芒繩斷。吼月耕雲便自由。

## 剛監院遣小師子文包山下書。文別求偈。兼示剛公

一葉輕舟泛太湖。西山來覓老僧居。歸家好為力生說。林底安閑是坦途。

## 法照大師求偈

戴角披毛老牴牛。牽犁拽杷幾經秋。腳跟終不隨人轉。鼻孔遼天得自由。得自由  
。洞庭湖裏冷啾啾。

## 老僧慧因。唱盡衣鉢。欲捨身火化。二偈誠之

衣鉢老來都唱却。赤條條地更身安。但教留得娘生袴。雪打風吹不解寒。  
好死何如且惡活。隨緣隨分傍巖隈。直饒野火燒殘後。依舊春風吹出來。

## 因禪者欲編語錄。以偈止之

吾祖初來字脚無。兒孫後代競編書。子今莫苦著文字。秘取圓明頂[寧\*頁]珠。

## 安禪者為思谿國覺專使。遠至國清。以偈却之

豐干端是饒舌漢。引惹閻丘特特來。累及寒山無雪處。巖門從此不應開。

## 達空大師始欲落髮。以偈止之

若能轉物即如來。糞掃堆頭正眼開。隨順眾生顛倒法。肯教一點污靈臺。  
逆順機中總是禪。在家不礙出家緣。龐翁父子團圈坐。始覺無生話不偏。

## 慧林。誠禪徒入浴

浴時少使一瓢湯。受用浮生日子長。薪桂未言京國貴。轆轤百尺幾夫忙。

## **誠參徒。睡不脫衣**

孤舟共渡有夤緣。一眾相依豈偶然。但我住山隨處所。不令衲子脫衣眠。

## **寄邃首座**

投老西山百不為。把茆是處可幽棲。太湖三萬六千頃。天與山僧作虎溪。

## **寄國清光長老。兼示諸衲子**

寒拾長談苦口禪。無人領解許多年。如今拽轉家風也。好把泥牛痛下鞭。  
豐干漏泄因饒舌。描邈虛空總是渠。翻笑閻丘無鼻孔。竈前禮拜覩文殊。  
聚頭作相都休問。那事如何為舉揚。放得肚皮滄海闊。世間無物不包藏。

## **寄普惠勝長老**

萬歲藤枝遠寄來。也應知我老衰頹。水邊石上扶持立。正眼時時為子開。

## **寄實相院主**

乞得包山古寺基。竹窓松檜作幽棲。何時一棹來相訪。說盡人間萬事非。

## **送炬禪者歸寧親**

出門烟水正茫茫。體露金風木葉黃。父母未生前一句。不知何地是家鄉。

## **送正禪者歸。為本師起塔**

先師骨冷已多時。千里迢迢特地歸。要會去來無間斷。箇中一步不曾移。

## **送暹禪者出京**

畢竟歸山是勝游。道人閱世本無求。小舟東下輕如葉。回首紅塵一笑休。

## **送珍禪者**

湖邊看子上歸舟。林底初驚一葉秋。要似羚羊長挂角。莫教獵犬得蹤由。

## **送全禪者。為普惠勝長老專使。下書回**

獨秀峯前一朵春。為傳消息豈辭辛。歸家覩取住山斧。作箇叢林向上人。

## **送印禪者**

要如璞玉深藏器。莫比囊錐立露尖。隨處關門安穩坐。不妨終日口如鉗。

## **送廣法初長老下鄉**

偎巖傍水我甘老。垂手入[廓-享+墨]公正時。異日歸來同粥飯。折鎧不用情人提。

◦

## **謁法報菴主。不值**

道人雲出山。軒窓有佳趣。松竹自說法。客來點頭去。

## **示小師法照**

菴小不能容汝住。湖邊相送頗依依。身心欲得長堅固。記取重圍喫菜時。

## 法逸云。嘗記墮城時。番人追逐時。回觀平江。變為瓦礫時。只此便是息心處也。師云。何止息心

三處莫忘真是藥。兩針不蓄亦無妨。渾身劫得燐雞盡。始好參禪作歇場。

## 聞平江焚爇

阿呵呵了阿呵呵。聚落都如螻蟻巢。一弄火銷無影迹。幾人於此悟南柯。

## 彥強求偈

老僧住世非長久。之子春秋正盛年。生鐵脊梁須豎起。莫於鄉井苦留連。

## 示師勤

出家畢竟事如何。超越情塵敵死魔。莫向叢林貪飽暖。百年光境等閑過。

## 示小師行脚。前輩打包。意在省緣。無冗細。無玩好。如德山挾複子。 到大湧。是也。今人打包。即不怎麼。鉢盂以梅花衲作袋。祠部用古蜀 錦為裏。淨瓶交枕。總要光鮮。拄杖戒刀。莫非濟楚。笠頂上。閑文潑 字。須及數斤。線貼裏。鞶樣針筒。將看一擋。只要別人道好。忘却自 己辛勤。若是脫洒衲僧。必不如是。草草地。掣箇包子。卓卓地。做箇 道人。直似野鶴孤雲。切忌無繩自縛。汝等更聽一偈

古人只蓄兩枚針。夏葛冬裘逐旋尋。汝輩盛年腳力健。好携複子歷叢林。

## 資福訓童行頌

世諦紛紛沒了期。空門得入是便宜。直須日夜常精進。莫只勞勞空過時。  
心猿易縱安教縱。意馬難調亦要調。到老情塵掃不盡。出家四事恐難消。  
焚香禮拜莫忽忽。目覩心存對聖容。懺悔多生塵垢罪。願承法水洗心胸。  
出家言行要相應。戰戰長如履薄冰。雖是未除鬚與髮。直教去就便如僧。  
也要學書也念經。出家心地要分明。他年圓頂方袍日。事事臨時總現成。  
出家不斷葷和酒。枉在伽藍地上行。到老心田如未淨。菩提種草亦難生。  
莫說他人短與長。說來說去自招殃。若能閉口深藏舌。便是修身第一方。  
常住分毫不可偷。日生萬倍恐難酬。豬頭驢腳分明見。佛地今生掃未休。  
莫學愚人說脫空。脫空說得有時窮。暗中莫道無人見。只恐難瞞馬相公。  
一等出家為弟子。事師如事在堂親。添香換水宜勤謹。自有諸天鑒照人。  
香積廚中好用心。五湖龍象在叢林。瞻星望月雖辛苦。須信因深果亦深。  
二時普請宜先到。眾手能為事不差。諷取如來經一卷。都勝閑話口吧吧。  
廊下逢僧深問訊。門前遇客要相呼。出家體態宜謙讓。莫似愚人禮數無。

家事精麤宜愛惜。使時直似眼睛看。莫將恣意胡拋擲。用者須知成者難。  
諸寮供過要精勤。掃地裝香莫厭頻。事眾若能常謹切。身心方是出家人。  
衣衫鞋襪須齊整。挂搭巾單不可無。身四威儀常具足。莫隨愚輩學麤疎。  
拳手相交不可為。麤豪非是出家兒。遭人唾面須揩却。到底饒人不是癡。  
三通浴鼓入堂時。觸淨須分上下衣。語笑高聲皆不可。莫將麤行破威儀。  
有時緣幹到街頭。照顧為山水牯牛。門外草深常管帶。等閑失却便難收。  
色身康健莫貪眠。作務辛勤要向前。不見碓坊盧行者。祖堂衣鉢是渠傳。

## 和蔡相面壁軒

見便直下見。碧眼明寸電。瞥爾落思惟。何啻千山遠。  
壁亦何須面。禪床今拽轉。翻笑鈍胡僧。更不作一喘。  
箇事本來如。風光滿帝都。酒樓春洞曉。盡現大毗盧。  
處處是方便。此理幾人薦。不識雪峯毬。錯認鹽官扇。

## 孫大夫求偈

論政已肩裴相國。談禪應笑老維摩。道存休恨歸來晚。一語投機已是多。

## 再住慧林。和高觀察韻

歸來飽睡懶談真。一任禪和喜作瞋。笑破野堂居士口。孤雲去住也由人。

## 答葛待制

與君同宿洞庭山。此箇因緣非等閑。好記燈前一句子。莫教流落向人間。  
終朝圓覺不曾迷。底事勞生強是非。一掃浮雲纖芥盡。箇中心月自光輝。

## 題孫主簿真慶閣

黃卷展開共佛語。青山長對伴僧禪。一鑪香盡六時過。浮世何人有此緣。

## 章學士。避地毛公山。號隱泉居士。因相約。作廬山餘。携偈赴之 杖藜來赴廬山飯。喜見公家園有蔬。安得龍眠老居士。丹青重畫隱泉圖。

## 吊王觀察

去年公到包山寺。林底相逢笑不休。今日我來公已去。石羊石虎替人愁。  
臨終一得老僧言。掃盡胷中事萬千。回首榮華都似夢。便能談笑死生前。

## 謝王七舍人。施手寫華嚴經。并大藏等經。及彌陀像

大千經卷毫端出。鐵劃銀鈎字字清。更會當頭這一點。六塵堆上放光明。  
大法流通千有春。西山猶未識金文。琅函玉軸照嵒谷。想見龍神亦喜欣。  
每日覩佛殊勝相。還如溪上見公時。堂堂風貌無凡聖。只要當人路不迷。

## 結茆包山。寄孫彥孚主簿

老矣休休卜養閑。囊空賒得洞庭山。朝中誰送米三合。風雨自存茆一間。清嘯有雲披月嶺。高眠無客打柴關。此情試為知音說。應隔滄浪冷破顏。

### 與俗兄相見

兄弟情深夙有由。死生岐路各須修。要知五欲坑中嶮。萬頃風濤一葉舟。

### 殷員外。為包山鑄鍾畢。求偈

包山一火鑄鍾成。百草頭邊總是聲。喚起勞生開睡眼。一時於此得惺惺。

### 李都事求偈

棒頭筆下宜精審。打鎧敲枷好用心。成佛作祖只這是。勸君不用別追尋。

### 孫保義求偈

省緣知足常安樂。廣費多求損道情。閭市門頭祖師意。放教心地坦然平。

### 吳保義求偈

前日相逢欣款曲。見君曾次坦然平。祖師有箇入門句。只要時中事事輕。

### 王員外求偈

勸君不用廣貪求。隨分家緣了便休。百歲光陰能幾日。得回頭處早回頭。

### 金大翁求偈

禮拜燒香新活計。行虹種橘舊家風。欲知自己彌陀佛。便是亢山金大翁。

### 許善友求偈

二十畝田供伏臘。無妻無妾自由身。回觀萬頃良田者。也是人間多事人。

### 善友誦金剛經。求偈

背誦金剛四十年。老來心地轉精專。勸渠不用憂生死。只此修行便是禪。便是禪。不須參。一句該通五百函。無我無人無壽者。塵塵剎刹笑瞿曥。

### 因讀法華經。至火宅喻。不覺一笑。因書偈。示孫主簿

夢裏分明有火殃。覺來心地本清涼。三車亦為兒童設。想見瞿曥別有方。

### 高道人云。和尚慧林小參。說。人身假合。似箇破砂盆。莫教失手打碎。便見千休萬休。師問。你這砂盆。使來幾年也。高云。六十三年也。

### 師笑云。照顧照顧

人身正類砂盆破。三篾束縛全暫時。暑往寒來宜愛惜。莫教土上更加泥。

### 高聞。眼中淚下。師云。有箇不破底。還識麼。高云。乞師指示。砂盆打破化為塵。始是撐天拄地人。舉世只言身是幻。不知誰是幻中人。

### 諸道友。以法愛故。常至包山。以偈却之

老僧多病厭將迎。且卜西山隱姓名。若是吾家真道友。隔湖相見最分明。

## 真州檀越求偈

了即業障本來空。心如聚蟻意如風。未了應須還宿債。破後還將茅草蓋。燈籠露柱笑呵呵。好是焦山口更多。奉報楊子江頭水。等閑無事莫興波(此人不數月因官事而死)。

## 資福改神霄。道友挽留不得。師去。以偈却絕

人生聚散本無常。休把閑愁愁腦肚腸。三十年後重相見。拍手呵呵笑一場。

## 慈受深和尚廣錄卷第二

### 補遺 擬寒山詩(共二十首)

我愛寒山子。身貧心自如。吟詩無韻度。燒火賸工夫。敝垢衣慵洗。鬚鬢髮懶梳。  
相逢但長嘯。肉眼豈知渠。

拾得詩清苦。風騷道自存。看雲歌竹石。步月出松門。識取心中印。休磨鏡上痕。  
時時多漏泄。塵世少知恩。

人生萍托水。流轉成愛河。鼓激無明風。出入生死波。一念若知歇。諸緣皆息魔。  
急須登覺岸。勸子莫蹉跎。

人生貪愛重。所欲未嘗周。一飯飽足矣。萬鍾心未休。黑業何時了。紅裙也自羞。  
鬚毛已侵雪。猶自日悠悠。

何曾食萬錢。顏子飲一瓢。賢者心念道。愚人志在庖。賢愚趣不同。何翅雲泥遙。  
參養恐非福。可信如昭昭。

人生貴無業。不貴多伎能。伎能人看好。業能灾汝形。文章妙天下。氣宇吞滄溟。  
此身若一失。六趣且飄零。

世間聰明人。必欲聞其過。寧知業所使。大抵貪成禍。因果鏡中容。容豈非是我。  
陰報最分明。詎論官職大。

人生如春花。能得幾時好。朝吹與暮洗。朱顏變枯槁。花落有後生。人老不復少。  
萬事只今休。莫更招煩惱。

世人怕說死。說著死便諱。及到死期來。老眼先垂淚。戀妻復戀妾。見神并見鬼。  
不入祖師門。癡迷直到底。

六十休造屋。七十莫置衣。縱然得受用。能得幾多時。身心要早歇。準擬與死期。  
正如人遠出。預辦為便宜。

道力與福力。平時似亂真。福力有盛衰。道力無富貧。人生不學道。只種輪迴因。  
君看天福盡。滿眼生埃塵。

自料七十歲。匆遽那能期。況今五六十。形骸覺漸衰。正如春暮後。青多紅少時。  
去住呼吸間。斯言真不欺。

譬如臨明鏡。面目各相對。好者默自欣。醜者亦知愧。惟鏡兩無情。光明常一體。  
◦若人心似鏡。成佛在彈指。

厚葬非孝心。死者必遭辱。君看離亂時。何墓不伐斲。黃金眾賊分。白日孤魂哭。  
◦最愛莊周叟。天地為棺木。

出家要省緣。省緣易入道。如何無事人。婁攬閒煩惱。奔赴富貴門。莊嚴房舍好。  
◦不知被物使。區區直到老。

若以爭止爭。其靜轉不已。惟忍能止靜。是法中尊貴。不見老瞿曇。妙相三十二。  
◦魔軍刀劍來。只以無心對。

人身苟無業。生死何足疑。生也不須戀。死亦不須悲。一身真逆旅。萬事皆兒嬉。  
◦請來綠岩畔。與君歌紫芝。

靜看營巢燕。銜口泥千轉。一洒貧家梁。一宿王宮殿。寄托暫時間。何暇分貴賤。  
◦人生達此理。沒齒無欣怨。

貧窮難作福。富貴易造罪。有力無道心。有心無貨賄。有福有道心。百中無一二。  
◦不見老瞿曇。福慧雙嚴美。

佛為大醫王。留經治眾病。眾生雖讀經。展轉不相應。病是貪瞋癡。掃除須淨盡。  
◦貪瞋癡不除。無緣了真性。

## 東京慧林慈受廣錄序

慈受和尚。說法偈頌。如大醫王應病用藥。無苟然者。世同喜聞而樂道也。師住世日。眾欲鏤板。師力止之。因命侍者。盡取私記焚棄。故終師之身。語錄未聞刊行也。師圓寂後。有得法沙門。聚師六處住持之語。銓簡編次。為上下錄。悉與衲子林下語也。若其逢場遊戲。放言肆說。俾眾生隨類得解者。多不見錄。余一日禮謁老師之塔。其徒相告曰。師之道德世舉知有。無待後人之發揚。然。辯才敷演。春雷震而秋漢傾也。今之所傳。簡約如是。百歲之下。私錄湮沒。學者聞其風而悅之。將何證諸。今欲集參徒所記。廣為之錄。命工揮斤。以示後學。余曰。前所流布。已違老師之意。今予又從而校。其□過益甚焉。其徒曰。不然。雲門和尚。說法如雲。殊不□人記錄其語。見必怒罵。當時明教以紙為衣。□所聞。即筆記之。今對機室中錄。皆所傳也。使明教從雲門言。則古塔主無因以悟。而今日叢林。不復聞當時所說也。我輩寧違背老師之誠。而願與後人共聞之。余曰。去彼取此。我不敢知。援明教之事。而流傳老師言句。則同道者。庶幾有取於斯。因□其語而□之。紹興乙卯上元日盛。

## 東京慧林禪寺慈受深和尚陞堂頌古上

### 侍者 普紹 編

供養六祖上堂。昨夜有人來報。初祖達磨。與二祖可和尚。三祖璨和尚。四祖信和尚。五祖忍和尚。六祖能和尚。來謁禪師。山僧遂教請。達磨近前展坐具云。久仰道風。無由禮見。山僧把住坐具云。彼此老大。不煩如是。達磨正視山僧云。九年冷坐熊峰頂。五葉花敷大地春。山僧云。少賣弄。二祖云。看著庭前三尺雪。特地令人兩臂寒。山僧云。鈍根阿師。三祖云。既知罪性元無染。一拳拳倒皖公山。山僧云。惜取眉毛。四祖云。悟來解脫無繩縛。拳倒虛空得自由。山僧云。未是好手。五祖云。少年再到傳衣地。翻憶前生種樹時。山僧云。貧兄思舊債。六祖云。莫遵春糠無伎倆。碓中搗出古菱花。山僧云。便重不便輕。達磨云。老僧遠涉鯨波。得到此土。兩回中毒。險阻艱難。備嘗之矣。以次諸人。立雪斷臂。種樹春糠。只為此事。如今兄弟。飽食高眠。不肯學道。可謂正眼近來如掃土。禪門難得好兒孫。山僧震聲喝云。尚敢嗽氣在。我此方人。本來無事。被你來這裏。胡言漢語。教壞他人家男女。更若忉忉。趕回葱嶺。莫言不道。達磨云。去聖時遙。也有恁麼長老。山僧云。說什麼也有。將拄杖一時趕出方丈。復召禪和子。六箇老漢。被我折合了也。這回肚裏無事。各請歸堂去。

為母作齋上堂。時光迅速急如流。一別慈顏幾換我。墳墓鄉關空杳杳。死生岐路兩悠悠。充飢乳哺恩難報。寄體懷擔力莫酬。想像音容無覓處。春風特地使人愁。恁麼說話。大似俗氣不除。恩愛未了。且道。衲僧將何報德。遂卓拄杖一下云。將此身

心奉塵刹。是則名為報母恩。

上堂。涅槃生死兩般名。正眼觀來一性靈。五蘊山頭雲散後。大千沙界月長明。這一段光明。輝天鑑地。耀古騰今。不曾欠少。於其光中。無生死。無去來。無壽夭。無窮通。見有生死。見有去來。見有窮通。見有夭壽者。皆見五蘊山頭陰雲未散。所以道。見聞如幻翳。三界若空花。聞復翳根除。塵消覺圓淨。直饒到這箇田地。更須知有衲僧拄杖子始得。且道。如何是衲僧拄杖子。良久云。不犯之令。

上堂。諸佛不出世三轉妙法輪。祖師不西來。一句徧天下。此一句子。是渡生死海堅牢舡也。此一句子。是破黑暗大明燈也。此一句子。是療眾病之良藥也。此一句子。是伐煩惱樹之利斧也。三世諸佛。傳此一句子。六代祖師。傳此一句子。一大藏教五千四十八卷。皆從此一句中流出。且道。這一句子。從什麼處流出。良久云。若向意根卜度。卒未有了期。

上堂。焚香擊鼓。問難縱橫。大施門開。頭頭漏泄。蛾蚌蟻子。盡演苦空。露柱燈籠。皆談般若。如斯指注。曲為今時。正眼傍觀。未為穩當。衲僧家到這裏。須知有三世諸佛形容不及處。六代祖師傳受不得處。天下老和尚摸索不著處。若向這裏透得。不妨於生死界中得大自在。若透不得。說食終不飽。

結夏上堂。三月安居要護生。蛾蚌蟻子亂縱橫。衲僧自有轉身路。不向時人行處行。良久云。三條椽下清風遠。六尺單前白晝長。

上堂。芭蕉聞雷開。還有耳麼。葵花隨日轉。還有眼麼。社桑知天風。還有心麼。海水知天寒。還有意麼。無情之物。尚自知時。多少衲僧。一向瞌睡。

普請般土上堂。資福為人處。從來無異路。飯飽譬如閑。共般數檐土。你行我亦行。你住我亦住。會得甚奇特。不會也相許。既是不會。為什麼也相許。雖然不得力。猶勝別勞心。

磨牛上堂。咄哉異類身。輪轉無休息。戴角復被毛。觳觫償人力。我觀佛與牛。其性本來一。良由昧此心。所以異形質。想汝為人時。豈信有今日。侵欺常住錢。互用招提物。是非信口談。酒肉恣情食。五戒既不持。人身安可得。今日墮牛身。方知無利益。

上堂。祖師門下。直截根源。但言見性成佛。此外□□異說。若論見性成佛之旨。各在當人分上。歷歷孤明。如日照畫。如月照夜。本來不昧。所以道。一切聲是佛聲。更無異聲。一切色是佛色。更無別色。以拂子擊禪床云。還聞麼。觀音大士。在你耳朵裏。轉大法輪。又舉起拂子云。還見麼。普賢菩薩在你眉水上。放光動地。然雖如是。更須知有離見聞絕聲色外一段事始得。你且道。如何是離見聞絕聲色一段事。會麼。待虛空點頭。即向你道。

上堂。纔見仲冬初。不覺又月半。光景急如梭。人情忙似鑽。白髮鬢邊添。朱顏暗裏換。名利競頭爭。好事無人看。臘月三十日。饒你是鐵漢。為什麼如此。良久云

。覺花有種無人種。心火無煙逐日燒。

印禪師赴蔣山請。過資福。上堂。禪門泊將氣如雲。江北江南把要津。莫怪林眾閑未待。掃除佛祖要當人。大眾。還見蔣山新堂頭禪師麼。心珠燦爛。氣宇高明。犀頂彫眉。河目海口。一揮塵尾。下視諸方。六處道場。平肩千聖。而況鍾山勝槩。江南上游。是寶公之覺場。乃舒王之禪室。久虛法席。今喜得人。四海參徒。望風景仰。況當今日。宗風不振。教法將沉。叨名竊位者。似粟如麻。振領提綱者。萬中無一。更望師叔禪師。放低氣宇。曲順人情。誘引方來。流通正眼。使圓照之道。昭昭然於天下者。非師而誰。資福小姪。道行無取。踈拙有餘。乍此傳持。百無所有。諸事荒涼。薄緣可歎。特蒙禪師象駕光臨。既然舊店童開。何惜逢場作戲。下座攀請禪師。略陞此座。大震雷音。使此一眾。得聞於未聞。恁麼說話。猶是諸人共知底事。且道。六耳不同謀底。又作麼生。記得米胡和尚。一日領眾訪普濟。濟纔相見。便拽轉禪床而坐。米胡於背後立。少時。便歸客位。濟云。也須驗過始得。再令侍者請米胡。胡纔至。便拽轉禪床而坐。濟遶禪床一匝。便歸方丈。米胡領眾便出。師云。看他古人相見。終不以世諦流布。一錐一箇。暗去明來。天然育異。雖則如是。未免欠他一著在。眾中商量道。普濟便拽轉禪床。翻成特地。又道。米胡於普濟背後立。遂成造作。又道。纔見拽轉禪床。便與掀倒。又有底道。但拈起坐具。臂背便撼。恁麼拈提。大似暴虎憑何。麤心太甚。若向密密處檢點。遠之遠矣。既不恁麼。且道。作麼生商量。諸人要見得分明。須是新蔣山禪師批判始得。

鏘鍾上堂。欲鑄紅爐百煉金。先煩廣結眾人心。刀山劍樹長年苦。好為勞生發妙音。大眾。忽若有箇盲聾瘡瘻底人。如何救得。良久云。佛手遮不得。人心自等閑。

上堂。昔時說有千般。今日看無一種。等閑拈轉虛空。始得平生受用。只如虛空。作麼生拈轉。換你眼睛。穿你鼻孔。

上堂。舉古人事。天地與我同根。萬物與我一體。只如目前燈籠露柱。淨餅香爐。無非是物。如何得成一體去。還會麼。切忌土上更加泥。

上堂。彌勒真彌勒。分身千百億。師下禪床行數步。却上座云。時時示時人。時人自不識。你若識得。焦山今日失利。

送化主上堂。焦山舊日時。堂安百餘眾。笊篱與木杓。如今不足用。多謝諸禪人。各出一隻手。南北與西東。面南看北斗。厨中一箇鍋。賣粥又不多。若非憲上座。誰人柰爾何。水陸會街坊。六人為摠領。但看正二月。夜夜香花請。二人同一心。打圍要種菜。意在饅頭邊。兩彩都一賽。臘月冷如冰。眾僧猶臥簾。二人去化簾。姑蘇也不遠。漆桶要打破。深禪却要光。但教無滲漏。得箇也無妨。鎮州蘿蔔頭。今年到處少。奇公去打錢。典座呵呵笑。法真小比丘。去覓鳴山牛。繩頭須緊把。鼻孔要牢收。迹在牛還在。無心終易求。要得十分好。更造一層樓。更有一件事。不小亦不大。擘也擘不開。跣也跣下過。常在動用中。未有人擔荷。你若肯發心。我為你說破。

上堂。舉僧問雲門。如何是韶陽一曲。門云。臘月二十五。僧云。學人便恁麼去時如何。門云。且緩緩。師乃云。好諸人者。唱者雖多。會者極少。往往會得這僧問處。不會雲門答處。焦山今日為你。真箇唱韶陽一曲。臘月二十五。拄杖二十五。燈籠二十五。拂子二十五。

普請栽菜上堂。焦山別無見解。且學古人栽菜。若還揔不生根。也是諸人有彩。無端跋死禪和。只要硬守疆界。忽然築著磕著。便見草賊大敗。大凡履踐此事。須要自由自在。從教土面灰頭。不怕風吹日[日\*煞]。老來意在饅頭漫。家風自有通人愛。

上堂。舉洞山夏末示眾。汝等諸人。初秋夏末。直須向萬里無寸草處去。後來僧舉到瀏陽庵主處。主云。何不道出門便是草。師乃云。洞山者子。有口無舌端語。便息道玄路。瀏陽叟。激濁揚漬。偏愛向無句中有句。慈受叟道。汝等諸人。初秋夏末。有六條路。一條可行。五條不可行。第一。不得向聖妙地上捏目生花。第二。不得向平實地上認奴作郎。第三。不得向光境門頭弄粥飯氣。第四。不得向無事閭中隈刀避箭。第五。不得向葛藤窠裏說黃道赤。第六條路。方許諸人行。且道。這一條路。作麼生行。還會麼。不因草鞋彼。爭覺路岐長。

上堂。莫謂無心便是禪。箇中有路更幽玄。繫驢橛子惟翻後。打著南邊動北邊。

上堂。一切法不生。一切法不滅。若能如是解。諸佛常現前。汝等諸人。好將每日馳求底心。體究斯事。久久之間。自然明白去。若不恁麼。皆是虛生浪死。不見古人道。努力今生須了却。莫教累劫受餘殃。

劉太尉請。上堂。不風流處也風流。匹馬追風四百州。金鏃離弦胸百戰。鐵鞭多力恨無讎。大眾。此事喻如軍前嚴後掣鼓奪旗之義。擬議之間。早是蹉過了也。山僧。於楊子江心海門山下。箇箇硬寨。用臨濟為先鋒。德山為殿後。挂三玄之戈甲。列五位之旗旛。架石鞏弓。操靈雲劍。打禾山之戰鼓。擎秘魔之硬叉。頂門正眼耀乾坤。袖裏金鎧驚佛祖。探竿影草。要須點著便行。入死出生。方是作家手段。然雖如是。且道。不動干戈。坐籌帷幄者。是什麼人。良久云。箭中紅心人莫問。大家齊唱太平歌。

檀越。供養華嚴五十三善知識。請上堂。諸人還見麼。毗盧界內。真如俗諦交參。華藏海中。諸佛眾生一體。古今三世。非後非先。凡聖一心。無迷無悟。是故。如來初成正覺。嘆曰。奇哉。我今普見一切眾生。具有如來智慧德相。但以妄想執著。而不證得。於是不起菩提場。而昇普光明殿。不離普光明殿。遍昇夜摩忉利兜率他化自在諸天。稱法界性。說華嚴經。令一切眾生。於自身中。得見如來智慧德相。是故。善財童子。參五十三人善知識。畢竟不離初心。過一百一十大城。要且未嘗舉步。諸人要見十重法界門。十重華藏海。一為無量。無量為一。一即一切。一切即一麼。遂拈起拂子云。一時向這裏薦取。還會麼。妙峯頂上急回首。古佛堂前著眼看。師復云。相公宿於華嚴性海。七處九會。有大因緣。每歲之中。常興此會。八十卷大經者

。隨此方眾生機感而來。若以重重無盡言之。何止於八十卷。三十九品。十萬偈。也有無量無邊塵沙法門。於其門中。或現天神。或現夜神。而為說法。或現童男童女。開闢妙門。或現外道虹師。或現長者居士。或現婆須密女。或現毗目仙人。或現無厭足王。或現勝熱婆羅門。信知。此事不在僧不在俗。不在男不在女。各各有箇三昧門。各各有箇華嚴藏海。神而嬰之。不出這箇。只如德山入門便棒。臨濟入門便喝。魯祖面壁。普化搖鈴。秘魔擎叉。石輩放箭。神而明之。亦不出這箇道理。善財童子。至大興城。參見明智居士。見居士住四衢道中。處七寶臺。薰以妙香。散以寶花。作諸音樂。一切眾生。聞其樂者。無不歡喜。爾時善財童子。禮居士足。白言。我已先發阿耨多羅三藐三菩提心。未知云何學菩薩道。修菩薩行。居士告善財童子言。我得出生隨意福德藏解脫門。且待須臾。汝當自見。言猶在耳。見一切人來居士所。而求種種資生之物。或求飲食者。或求湯藥者。或求錢財寶物者。或求衣服者。爾時。居士。觀察眾生所欲。繫念□時。仰觀虛空。一切諸物。從空而下。如其所須。施與眾人。然後為說種種妙法。師云。也甚奇恠。明智居士。得出生隨意福德藏解脫門。便有如是殊勝之事。只如相公。作如是佛事。有如是莊嚴。亦不普繫念片時。亦不曾仰觀虛空。且道。相公得何三昧。證何法門。便得如斯。若也知得。便乃坐參諸位。立見文殊。其或未然。更為諸人注破。良久云。本地風光何似生。誰明日午打三更。直饒金印大如斗。爭踏毗盧頂上行。

檀越□新宅請上堂。物物到心上。全心物自閑。古今城□□。得者□如山。且道。得箇甚麼。良久云。但願清風生兩腋。不愁無路到人間。太尉。新營華館。喜見落成。供佛飯僧。以伸慶懺。適來智海天寧二老。已為諸人。委曲發揚了也。又教慧林。說箇什麼。然則世尊三昧。迦葉不知。迦葉三昧。阿難不知。慧林三昧。諸人不知。且據慧林三昧所觀。太尉高堂峻宇。庭竹池蓮。宛若山林。不類城市。又恐動土興工。損害物命。庶憑清淨之因。以滌過悞之咎。大凡損害物命。勞役人夫。無出修造。昔曹將軍。晚年居處踈漏。家人請加修葺。曹公曰。時方大熱。牆壁瓦礫之間。百虫生長。不可傷生。家人曰。微細虫命。既不可傷。昔公為大師領大兵如何。曹公曰。我為國事時。未嘗私喜怒輒戮一人。如曹將軍。真善用其心者。經云。佛子善用其心。則獲一切勝妙功德。又王大王問雪峯和尚云。擬欲蓋一所佛殿如何。峯云。何不蓋取一所空王殿。王云。請師[打-丁+秉]子。峯展兩手。後雲門云。一舉四十九。師云。這箇殿子。久無人覩著。直得梁柱傾斜。牆壁頽落。不是雪峯重新建立。多少人枉用工夫。貧道。今日因行不妨掉臂。為諸人撐拄一上。會麼。空王殿子幾經秋。日[日\*煞]風吹古路頭。莫恠今朝聊點破。恐人一向外邊修。

元日喬貴妃作齋。請上堂。暖日[日\*煞]開地面凍。春風吹拆嶺頭梅。他知物物無遮障。自是時人眼不開。和風動地。全提少室家風。瑞草爭春。漏泄曹溪消息。無一處而不彰妙用。無一處而不顯真心。揚佛祖之大機。廓□天之正眼。高低嶽瀆。共轉

根本法輪。巨細鱗毛。普現色身三昧。若向一處薦得。百處千處皆通。其或擬議思量。何啻白雲萬里。大內貴妃。皆是前生位中。諸佛會上。福慧雙修。故得今日示現應身。行菩薩行。助揚教化。經云。乃至於王後宮。變為女身。而為說法。如是明得。方知。貴妃終日說法。利益群生。未嘗間斷。且道。說什麼法。諸人要知麼。簾卷春風歌舜日。鑪焚百和祝堯年。

檀越生日作齋。請上堂。直饒問者如青天霹靂。答處似旱地爆雷。明眼人前。一場漏逗。況祖師正令。不落言詮。纔落言詮。便成染污。所以趙州五年分蹤不下。黑達磨九載欲語無口。更無義路可商量。豈有語言挂唇齒。然雖如是。到這裏。不免重為混沌畫眉。虛空著襪去也。憶得大原孚問鼓山。父母未生時。鼻孔在甚麼處。山云。即今生也。鼻孔在甚麼處。孚不肯。乃云。你問我。山云。父母未生時。鼻孔在甚麼處。孚遂搖肩而已。師云。看他古人。等閑拈出等閑別。造次施為造口新。雖則恁麼。苦據山僧。檢點將來。太原孚。被鼓山輕輕一拶。便見漏口。當時纔見鼓山復問。便好與他口草料。為什麼如此。路逢劖客須呈劖。不是詩人莫獻詩。

檀越薦要請上堂。奔馳光景幾番春。何事臨風一慘神。柳綠桃紅依舊在。今年不見去年口。良久云。幸然明似鏡。向用曲如鈎。昔日莊周妻死。惠子吊之。周乃鼓盆而歌。惠子折之。周。遂論氣形生死之變。為春夏秋冬之行。師云。窮根源說道理。不無莊生。若是超夢幻出輪回。則未在。不見釋迦老子道。本自無生。今亦無滅。永嘉又道。自從認得曹溪路。了知生死不相干。這裏明得。方知。生死去來。猶如著衫脫袴。了無疑滯。只如今日。希言自安人去世後。一年之中。印施經典。種種追悼。且道。與莊周所見。是同是別。還會麼。莊周妻死鼓盆歌。畢竟無由奈爾何。爭似希言今日意。修崇直使見彌陀。

為月印禪師移厨就塔所。上堂。葉落歸根萬事休。來時無口句難酬。虛空忽爾翻筋斗。嚇倒雲門六不收。昔日肅宗帝。問忠國師。和尚百年後。所須何物。國師云。與老僧造箇無縫塔。帝云。請師塔樣。國師良久云。會麼。帝云。不會。國師云。吾有付法弟子耽源。却諳此事。請詔問之。國師遷化。帝詔耽源。問此意如何。源云。湘之南潭之北。中有黃金充一國。無影樹下合同軒。瑤璃殿上無知識。雪竇道。無縫塔見還難。澄潭不許口口口。層落落影團團。千古萬古與人看。師云。古人口口口話。好則甚好。不免帶累兒孫。一向住死水裏做伎倆。不能活路上作生涯。忽有人問慧林。如何是無縫塔。只向他道。春風院落無人到。野杏山桃爛熳開。師復云。慧林自元豐中建立。前後四十餘年。已歷十代住持。四人終於此地。五人化於外方。信知百年一俯仰。三界一坐具。山僧道行不及古人。學問不如晚輩。叨忝來此。繼續諸公。無補宗風。仰慚佛祖。今日諸道友。又請就塔前陞座。到這裏。合說箇什麼即得。若說佛說祖。菩提涅槃。真如解脫。大似擔水河頭賣。總不恁麼。合作麼生。夜來得箇夢。非常了了。今日舉似大眾。睡中信步到園上。纔入門便見月印。云。和尚何故訪及。

山僧云。明日移厨。先來問訊。月印云。和尚住持不易。如今做長老最難。況在慧林。衣冠所會。衲子雲集。是非好惡。種種不同。不易支撑。山僧云。禪師在此安隱否。不至寂寞否。月印云。甚安隱。又得覺海佛陀佛光諸老相聚。終日道話。甚有法喜禪悅之味。須臾諸老偕出相見。就坐喫茶。山僧云。時中住持事繁。不得頻來問訊。邇來叢林凋弊。難得本分宗師出世。諸公何故許多時。只管在此冷坐。真燈慧命。當使誰續。諸老笑云。誠如所言。若道可行。則赴湯蹈火亦不<sup>□</sup>。道若不可行。且卷而懷之。近來學者醇而不雜。<sup>□□□</sup>得。謂得者多。退步者少。爭鋒者多。求寂默者<sup>□</sup>。尚<sup>□</sup>言者多。是故。人心不一。祖道雖行。覺海起立。今日相會。豈同偶然。遂拈筆書頌云。一著天衣無縫襖。不風流處也風流。靈羊挂角二十載。從聽時人覓路頭。諸公盡笑幾絕倒。佛陀遂書偈云。當年飛錫別河東。直入都城唱祖風。壁立三關禪子訝。自知不愧老黃龍。佛光云。無縫塔前春草青。涅槃生死本空平。閑來唱箇囉囉哩。世事都如熱椀鳴。月印云。一入王城三載過。慧林人事就中多。如今不打這鼓笛。且伴松風明月歌。諸老云。和尚為月印作齋。不可無語。山僧遂云。自慚無德繼高蹤。百事荒唐懶更慵。要死山今死未得。且將香火奉諸公。諸公大笑。少頃。有百餘僧至。老少肥瘦不等。山僧問云。甚處僧。僧云。普同<sup>□</sup>裏挂搭僧。來禮拜和尚。內有一人云。適問諸大禪師有頌。某甲亦有一偈。不敢形於紙筆。聊口<sup>□□</sup>遍云。灌漿餽餡多年別。脯插頭羹久不嘗。盛謝諸人來供養。拈[匙-七+巳]把筋也無妨。佛陀高聲喝云。你禪和子。只說喫底。去去。一時走散。山僧遂睡覺。眾中禪和子道。慧林長老。青天白日。對眾說夢。山僧向他道。夜來做底是夢。如今說底是夢。生底是夢。死底是夢。會麼。夢裏移厨夢裏來。夢中陞座夢中齋。夢中生也夢中喜。夢裏死事夢裏埋。萬事不由人計較。一身休更巧安排。<sup>□</sup>知夢裏惺惺者。達磨西來<sup>□□</sup>鞋。

檀越請就<sup>□</sup>慈塔下上堂。瑞氣氤氳鎖梵宮。峯峩寶塔倚高空。簷楹金碧光相照。盡落山僧一頓中。還會麼。諸人纔到竹竿巷口。望見塔尖。便急回去。猶較些子。其或未然。慧林不免因風吹火。就虎添斑去也。教不云乎。若人散亂心。入於塔廟中。一稱南無佛。皆已成佛道。何況此日一會。香雲馥郁。花雨繽紛。種種莊嚴。種種供具。便是靈山會上。何殊多子塔前。一瞻一禮盡真如。或讚或揚皆妙用。雖然恁麼。在諸人分上。各有箇無縫塔子。還曾莊嚴也無。若道曾莊嚴。且如何下手。三世諸佛。不知樣度。六代祖師。只得傍觀。虛空寬廓不能容。大地無邊載不起。有時四稜著地。有時八面風生。有時孤迥峭巍巍。有時當處層落落。趙州五年分蹤不下。達磨九載不敢承當。也知徧界不能藏。始信從來無縫罅。眾中忽有箇頂門具眼底衲僧。袖裏藏鋒底居士。出來問道。如何是和尚無縫塔。又且如何祇對。還相委悉麼。良久云。看我老來唯柳眼。買人春去是榆錢。

道友作蓮花會請上堂。靈山會上拈花。微笑者飲光。少室山前五葉。分葩者慧可。自此根苗有異。枝葉扶疎。靈雲見處徹疑情。陸亘觀來醒夢眼。舍利弗強生分別。

須菩提特地周遮。從它萬紫與千紅。白有清香□撲鼻。還相委悉麼。莫將肉眼眼中見。直向頂門門上著。此日一會。皆是上妙供具。殊勝莊嚴。有力者六肯發心。有心者力所不及。又有一等人。忽有為法經云。厭棄有為。是菩薩魔事。諸人每日享上妙五欲樂。却云。怕作有為。乃自欺誑也。昔日一居士。問智藏和尚。因果是有否。天堂地獄是有否。智藏皆云。有。居士云。某甲曾問徑山和尚。皆云無。智藏云。居士有家否。士云。有。又問。居士有妻否。士云。有。智藏又云。徑山和尚有家否。有妻否。士云。無。智藏云。徑山恁麼道不妨。居士分上。不得道無。看它古人垂慈。直得如是。諸人。且去人天路上。開箇光明種子。不可說過頭話。大不濟事。不見。黑齒梵志。一日兩手持兩枝花。往見佛。佛云。放下著。梵志放下左手中花。佛又云。放下著。梵志又放下右手中花。佛又云。放下著。梵志云。我從家中。將兩枝花來。一時放下了也。更教我放下甚底。佛云。我不教你放下花。令你放下內六根。外六塵。中六識。無放捨處。即是汝免生死根本。師云。釋迦老子。只知見免放鷹。不覺鑽頭入草。山僧更為你注破。若會得。且於祖師門下。做箇小歇場。休休休。放下著。無量劫來靈性惡。只知貪愛黑如雲。一段光明都昧却。休休休。放下著。浮生不用多圖度。榮華富貴總成空。到頭唯有無生樂。

檀越中秋日請就家上堂。年年今夜月華多。一點雲生仗是魔。爭似曹溪門下叟。一輪空月照婆婆。所以道。心月孤明。光吞萬象。光非照境。境亦非存。光境俱亡。復是何物。還會麼。月落乾坤闔。金剛眼自明。師復云。靈山一瞬。迦葉末上承當。少室九年。可座主最初領解。由是。佛佛授手。祖祖相傳。唯此一心。更無別法。在聖而不增。處凡而不減。無添減處。強名曰一心。此一心靜時。亦無三界。只為眾生迷時三界有。悟去十方空。先聖不得已。有一言半句。如將黃葉作金錢。權止小兒啼哭。然雖如是。幾箇知音。吳國夫人。有如是壽筭。有如是子孫。有如是宅舍。有如是富貴。以理推之。來源自有。更願夫人。堅固道心。增修白業。直至成佛。方為究竟。教云。一切眾生。具有如來智慧德相。但以妄想執著。而不證得。於是稱法界性。說華嚴經。法界者。一切眾生真心之本體也。如是則一切眾生本來是佛。佛者以何為義。以覺為義。梵語佛陀。此番為覺。在迷底人分上。謂之背覺合塵。在悟底人分上。謂之背塵合覺。諸佛覺有三義。自覺。覺它。覺行圓滿。自覺者。勝凡夫不覺。覺它者。勝二乘人。只解自覺。不能覺它。覺行圓滿者。勝菩薩。菩薩雖修如上二覺。未能圓滿。佛謂之大圓滿覺。如中秋月。無幽不燭。初機之人。十二時中。一箇覺字觀照。日久歲深。塵勞境界。自然淡薄。永嘉云。覺即了。不施功。一切有為法不同。住相布施生天福。猶如仰箭射虛空。勢力盡箭還墜。招得來生不如意。爭似無為實相門。一超直入如來地。如來地者。便是覺也。此是成佛作祖之捷徑。超生越死之路頭。三世諸佛共傳。六代祖師同說。願生深信。莫作等閑。不見。肅宗帝問忠國師。時中如何用心修行。國師云。但能二六時中覺妄修真。如煉精金。光明轉熾。一切

眾生。癡迷不覺。從開眼至合眼。所作無非虛妄。何嘗覺悟來。你如今食前方丈。水陸畢陳。還覺宰殺物命麼。你居華堂大廈。還覺還當麼。你羅綺千箱。還覺衣不蓋身者麼。你鞭撻奴婢。還覺無慈悲麼。這裏若覺得快時。設使墮在地獄。亦須早出頭來。古人謂之。不愁念起。唯恐覺遲。起即是病。覺即是藥。常以此藥。而治此病。如水救火。即時而滅。昔為山問中邑和尚。如何是佛性義。邑云。我為你說箇喻。如一間屋。周回六竅。中間繫一獮猴。東竅喚。東邊應。西竅喚。西邊應。如是六竅俱喚。六竅俱應。為山又問。忽然獮猴睡著時如何。邑下禪床擒住云。狹狹我與你相見。諸有智者。以譬喻得解。六竅者。六根門頭也。獮猴者。一精明性也。佛云。本是一精明。分為六和合。只是者箇獮猴。時中合惺惺處。却不能了了地惺惺。時中□□□處。却不能齁齁地瞌睡。諸人若也未會。更聽□□。人人有箇老獮猴。暮四朝三卒未休。喚著便能□□處。八花碍上輶金毬。

上堂。□宵燈燭鬪熒煌。幸馬縱橫徹曉忙。倒底不知燈是火。區區幾箇解回光。若論此事。正如上元夜燈毬相似。玲瓏八面。花光互分。一點靈明。通身不昧。高低普照。前後無差。從來佛手不能遮。任是劫風吹不滅。直得馬行街上。四時春色盈門。豐樂樓前。半夜歌聲聒耳。處處祖師鼻孔。眾生日用不知。頭頭古佛眼睛。幾箇閑中警地。是故。諸佛出世。傳此一燈。祖師西來。亦傳此一燈。從一燈傳百千燈。光明無盡。所以道。佛法無人說。雖慧不能了。譬如暗中寶。無燈不可見。寶者。是一切眾生心也。暗者。一切眾生惱煩也。燈者。一切善知識說法也。迺至一大藏教。五千四十八卷。皆是與人為燈為燭。德山入門便棒。臨際入門便喝。亦是與諸人為燈為燭。趙州庭栢。靈雲桃花。亦是與諸人為燈為燭。敢問諸人。百千萬億燈。既從此一燈出。且道。此一燈。自何而得。舉拂子云。還會麼。明明一點無遮障。大地山河莫覆藏。

檀越請上堂。靈羊挂角時。箇事絕毫釐。既能通一線。方便有高低。靈山會上。五十餘年。將無作有。不遇知音。少室峯前。一坐九年。以東為西。罕逢同道。自此南宗□□□代兒孫。白日青天。唱九作十。神而明之。只要□□□□入處。不見昔日長慶稜道者。往雪峯玄沙□□。平生破七箇蒲團。並無所得。一日因堂中捲簾。忽然大悟。有投機頌云。也大差也大差。捲起簾來見天下。有人問我解何宗。拈起拂子罵口打。諸人每日聞聲見色。觸目覩對。因甚麼不悟。良由見不超色。聽不出聲。墮在見聞。翻成影事。遂以拂子擊禪床。還聞麼。只為分明極。翻令所得遲。復云。諸佛為眾生說法。先談苦空。談苦者。為見眾生認苦為樂。談空者。破一切眾生堅執之心。昔日優闐王。問賓頭盧尊者曰。佛法切急處。願乞垂示。尊者曰。譬如一男子行於曠野。被六牙白象所逐。其人見一枯井。井畔有樹。樹上有藤。垂於井中。其人以手攀藤。懸身於井上。下有三毒龍四毒蛇。上有黑白二鼠。更互咬藤。又有諸毒蜂蠍。其人時復得蜜一點兩點。滴在男子口中。因喫其蜜。遂忘其苦。尊者問王曰。此人。苦多樂多

。王曰。此人都是苦相。安有樂也。尊者曰。諸有智者。以譬喻得解。大象者。無常也。四蛇者。四大也。三毒龍者。三塗也。諸蜂者。苦相也。藤者。命根也。蜜者。五欲樂也。黑白鼠者。晝夜也。大王聞之。忽然有醒。又僧問龍牙。二鼠侵藤時如何。牙云。須有隱身處始得。僧云。如何是隱身處。牙云。還見儂家麼。師云。若向這裏。會得龍牙意。便可打破五欲蜂窩。吞却無常大象。出生入死。更無障礙。□或未然。莫因三寸舌。辜負百年身。復拈云。二鼠侵藤真百苦。四蛇圍井過千憂。忽然我斷藤根子。道是千休與萬休。諸人還知有一人。寒暑不能推遷。造化不能移易。口吞劫火。腹貯風輪。當在動用中。動用中尋渠不得。且道。渠是誰。良久云。從來雖共住。畢竟不知名。

道友過江州請上堂。昔日仰山問僧。甚處來。僧云。廬山。曾到五老峯麼。僧云。不曾到。仰山云。上座不曾遊山。雲門道。此語皆為慈悲之故。有落草之談。古人從苗辨地。因語識人。即且止。諸人曾遊五老峯麼。師笑云。又恁麼云也。識得廬山五老峯。箇中何地不相逢。舌頭無骨隨人轉。熨斗煎茶銚不同。表之今日作齋。其實無它。近有廬山之行。要與諸道友一飯相別。然則道人分上。一聚一散。有何間然。在世諦中。豈無依戀。況表之身心純熟。道義不忘。念茲在茲。摸索釋迦老子鼻孔。或坐或臥。體究達磨祖師眼睛。更能於做官之處。種種方便。外護法門。現宰官身。行菩薩行。當淺斟低唱之際。正好善用殺人刀。臨敲枷打鑽之時。却須拈出活人劍。與一切人。解粘去縛。與一切人。抽釘拔楔。未發心者。勸渠發心。未知有者。令他知有。可謂因風吹火。用力不多。涅槃生死是空花。隨順眾緣無罣礙。慧林也有箇末後句。却請諸人靜却耳根。向鼻孔裏薦取。良久云。溪頭楊柳未堪折。嶺上寒梅已過時。欲贈行人無所有。為君拈出歲寒枝。遂拈拄杖云。還會麼。撥開王老峯前路。放出三峽橋底雲。

檀越請上堂。祖師心印沒遮藏。一句臨時要廝當。莫謂座間人不識。台星炯炯照虛堂。法無凝滯。道本隨緣。應現千差。殊途一致。觸物皆妙。敵體全真。與世推移。隨宜運用。一切文字。治生產業。皆與實相不相違背。如是則方能回首塵勞。示現宰官。作諸佛事。刀頭劍刃。運大悲光。握筆援毫。區分死活。成就王業。毗贊太平。萬變施為。無非這箇。還會麼。良久云。一點靈光發照時。山河石壁無遮障。復云。昔日僧問雲門。一切智通無障礙時如何。門云。掃地潑水相公來。諸人還會麼。欲識佛性義。當觀時節因緣。時節若至。其理自彰。況當春光爛熳。膏雨頻霑。眼界無塵。禪門肅靜。不用掃地潑水。相公釣旆光臨。傾蓋相逢。且道。是何道理。若向這裏薦得。古釋迦不前。新彌勒不後。人人胸題卍字。各各項佩圓光。不假薰修。從來具足。還會麼。掃地潑水相公來。人人明鏡桂高臺。碧油幢下呵呵笑。青眼何妨特地開。

檀越作炙茄齋請上堂。若據本分事中。說箇什麼事即得。便道人人具足。正是眉上畫眉。更言箇箇圓成。何異眼中著屑。總不恁麼。又作麼生。三寸舌頭無用處。一雙空手不成拳。復微笑云。昔日天台山國清寺炙茄次。寒山子拈茄串。於典座背上拍一下。典座乃回頭。寒山豎起串云。你且道。費却我多少油醬。師云。當時金沙不辨。玉石難分。自古至今。費油費醬。先聖莫不頭頭漏泄。處處打開。又布袋和尚。或在十字街頭。三叉路口。躉去人背上拍一下。纔回頭。展手云。乞我一文錢。師云。且道。寒山布袋意在於何。還會麼。寒山癡裏放姦。布袋閑中打鬪。眾生業識茫茫。幾箇眼睛定動。要知祖師妙門。畢竟不離日用。乃豎起拂子云。天時炎熱。伏惟珍重。

高觀察請上堂。山僧早來也恁麼說。諸人早來也恁麼聞。如今山僧又恁麼說。諸人又恁麼聞。始知說無別說。聞垂別聞。亘古亘今。恒恒如是。上至諸佛祖師悟此理。不曾添一絲毫。下至六道四生迷此理。不曾減一絲毫。無添減處。便是諸人本地風光。腳跟下事。□□□巖問洞山。甚處來。山云。荊南來。巖云。觀察使姓什麼。山云。不得姓。巖云。名什麼。山云。不得名。巖云。還理事也無。山云。他自有廊幕在。巖云。還出入也無。山云。不出入。巖云。豈不出入。山拂袖出云。巖來日下堂中。昨日問話僧在麼。洞山便出。巖云。某昨日錯對一轉語。夜來睡臥不安。請上座別一轉語。巖却問。還出入麼。洞山別云。太尊貴生。巖遂喜云。三十年住山。今日方遇知音。遂請洞山過夏。師云。古人恁麼說話。可謂暗中有明。奇特中奇特。偏中有正。尊貴中尊貴。然雖如是。若到德山臨際面前。即不恁麼。有時問在答處。有時答在問處。有時答不在問處。有時問不在答處。你若擬議。老僧在你脚底。忽有人問山僧觀察姓什麼。但向他道。有耳者皆聞。名什麼。老僧口門窄。管事也無。管事。出入也無。出入。尊貴麼。尊貴。為什麼如此。莫恠渠儂多意氣。他家曾踏上頭關。

檀越薦小兒請上堂。擊鼓三通絕是非。本來無悟亦無迷。山僧不是多唇吻。謾把空拳嚇小兒。遂舉拳云。還會麼。這裏不會。不免為蛇畫足去也。記得昔日僧問趙州。初生孩子。還具六識也無。州云。急水上打毬子。僧不會。馳此語問投子。急水上打毬子。意旨如何。子云。念念不停流。諸人要會生死路頭麼。如門開相似。更無凝滯。須會趙州投子之語。只如保承奉。向五欲波中。六年之內。打這一隻毬子。不妨手親眼辦。令人可愛。忽然照顧不著。打落水底。且道。這毬子打落。向什麼處去也。若覲得破。彭祖不為壽。殤子不為夭。太山不為高。秋毫不為小。其或未然。更為諸人添箇注脚。朝日忙忙打毬毬。生來念念不停流。若知落處無蹤跡。始會雲門六不收。

檀越請上堂。佛佛未嘗演說。祖祖皆云密傳。聖解難思□心莫測。先天後地。隨成壞以常存。入死出生。任去來而不變。了知眾生本來成佛。如印印空。更無痕跡。是以道。靈臺不磨而自瑩。真源不決而自流。妙花不植而自生。玄機不撥而自轉。敢

問諸人。作麼生說箇不撥而自轉底道理。良久云。玉犬吠開天際月。鐵牛耕斷嶺頭雲。師復云。靈雲和尚。參見大鴻云。三十年中。如蚊子上鐵牛。都無下觜處。一日下山見桃花。忽然警地。有頌云。三十年來尋劍客。幾回葉落又抽枝。自從一見桃花後。直至而今更不疑。玄沙云。諦當甚諦當。敢保老兄未徹在。師云。且道。那裏是靈雲未徹處。頂門具眼底。舉著便知。腦後安眉者。猶懷罔措。還會麼。三十年來信脚行。一朝跳過是非坑。桃花歲歲隨流水。一任傍人把路爭。

檀越請上堂。雲籠大野。迦葉攢眉。雨洒長天。空生下淚。處處皆明實相。頭頭盡露真心。無一法從外而來。盡是箇中流出。不見道。風動心搖樹。雲生性起塵。不明今日事。昧却本來人。僧問芙蓉和尚。本來人還成佛也無。芙蓉云。你道。虛空解煩惱也無。僧云。不解煩惱。芙蓉云。本來人不解成佛。師云。恁麼會得。方知本無生滅。亦無去來。亦無是非。亦無動靜。但恁麼信去。久久之間。自然光明透漏。圓練。今日本欲移厨就家。供養大眾。追悼夫人。適值風雨所隔。不遂推意。據出僧所見。來此修崇。更且殊勝者。有長者名曰妙善。請佛及僧。歸家供養。佛遂許之。於是。長者嚴淨廳堂。掃洒道路。其子問曰。以何因緣。嚴淨道路。父云。我欲請佛來家供養。子曰。供養瞿曇。意圖何事。父云。汝不聞。如來出世。是大福田。我欲於中而下種子。子曰。譬如世間良田。人若耕種。取田就種。將種就田。父云。田不可移。種子可往。子曰。若請世尊來就我供。必須遠涉程途。辛勤往返。未來世中。縱獲福德。受福之時。亦須辛苦。不若令佛及眾。坐受供養。使我獲福亦復如是。時長者。如子之言。詣彼供養。佛讚嘆云。父知供養。子善分別。爾時世尊即說偈言。田不可往。種子自來。未來世中。獲福如是。團練來此修設。正依經語。使我一眾。三條椽下。自在展鉢開單。十字街頭。更不拖泥帶水。因既如是。果亦復然。不獨使夫人承此善因。人間天上。坐享如意。亦使團練此世他生。坐享安逸。坐享富貴。坐進此道。坐地成佛。

檀越請上堂。若據本分相見。眨上眉毛。蹉過久矣。且如釋迦掩室。已涉繁詞。居士默然。囊錐已露。須信道。恁麼也不得。不恁麼也不得。恁麼不恁麼總不得。若向箇裏轉得過來。便乃拽轉祖師鼻孔。不歷古佛階梯。向函蓋乾坤處。隨波逐浪。向隨波逐浪處。却能截斷眾流。然雖如是。且道。舉一明三一句。作麼生道。良久云。東山水上行。師復云。昔日西天南印土香至王。生三子。一名月淨多羅。次曰功德多羅。三名菩提達磨。即二十八祖也。王一日請二十七祖般若多羅齋。深加敬重。懶一寶珠。尊者持珠。問三太子。此珠如何。月淨多羅云。此珠無價。於諸寶中。最為第一。功德多羅云。此珠。父王愛惜。非尊者有道。孰肯施之。般若多羅。復問菩提達磨。此珠如何。達磨云。此是世珠。未足為貴。於諸寶中。心珠為貴。珠不自珠。要假心珠而辨珠。尊者知是法器。後化出家。師云。諸人每日辨金玉別珠珍。若無自寶。將何鑑照。所以道。從門入者不是家珍。若識家珍。一生受用不盡。迺至給濟孤

露。饒益有情。皆從此寶中流出。諸人要見麼。諸公不是不將來。山僧豈是不拈出。

道友煎筭請上堂。道源不遠。性海非遙。但向己求。莫從他覓。覓亦不得。得亦不真。修是他心。不如自性。自性清淨。即是法身。無一法從外而來。盡向自己胸襟流出。不見。清源和尚問石頭。汝從什麼處來。頭云。從曹溪來。思云。汝到曹溪。得箇什麼。頭云。未到曹溪亦不失。思云。既不失。何用更到曹溪。頭云。若不到。爭知不失。思舉起拂子云。曹溪還有這箇麼。頭云。非但曹溪。西天亦無。思云。汝曾到西天否。頭云。若到即有也。思云。眾角雖多。一麟足矣。師云。此謂之胸襟流出。本分相見。今日蓋居士煎筭。供養大眾。憶得趙州和尚。路逢凌行婆問。向什麼處去。婆云。偷趙州筭去。州云。忽遇趙州時如何。婆子便掌一下。趙州便歸院。雪竇道。好掌。更下兩掌。也無勘處。師復云。無勘婆子處。無勘趙州處。慧林今日因齋慶讚。為諸人點破。婆子無心偷筭。惡名已播叢林。趙州有失關防。閑裏遭他毒手。然雖如是。落便宜是得便宜。

施主薦亡請上堂。生時水是冰。死時冰是水。若知無去來。只此兩般是。便能於茲曉了。必定跳出輪回。其或未然。且在金蜂窠裏。師復云。一切眾生。無量劫來。妄想[真\*真]倒。於無生滅中。妄見生滅。殊不知。生死涅槃。猶如昨夢。如昨夢故。當知生死與涅槃。無起無滅。其所證者。無得無失。又如病目人見空中花。空實無花。病者妄執。記得古人道。識得衣中寶。無明醉自醒。百骸俱潰散。一物鎮長靈。遂拈拄杖云。拄杖子不可靈也。又舉拂子云。拂子不可靈也。諸仁者。如今百骸未散。六根完具時。便要認得箇靈底一物。諸人若無此物。十二時中。將什麼拈匙把筋。及動轉施為。諸人若無此物。即今將什麼聞法。臨際喚做無位真人。六祖呼為本來面目。石頭名為菴中不死人。洞山指作家中不老者。譬如大海之水。通貫百川。在江曰江水。在河曰河水。及到通宗會源處。雲霞消散時。又且喚做什麼。要知端的。問取虛空。

顧大夫為妻懷□請上堂。般若無知。無所不知。般若無見。無所不見。無知之知。是為真知。無見之見。是為真見。昔僧問智門。如何是般若體。門云。蚌含明月。又問。如何是般若用。門云。兔子懷胎。師乃云。兔子懷胎。蚌含明月。乘時正在中秋節。一顆明珠轉玉盤。徹底無瑕光皎潔。

檀越請上堂。紅日三竿高枕處。黃糧一鉢飽齋時。分明千聖排肩立。不肯承當過在誰。人人是佛。眾生日用不知。各各圓成。幾箇閑中警地。只為迷己逐物。執妄為真。從來蹭蹬覺虛行。多年枉作風塵客。致使家中至寶。拋離向五蘊山頭。衣下明珠。流落在三塗路上。甘心乞丐。枉受貧窮。若能一念自回光。始見千生真面目。復拈起拂子云。會麼。良久云。不覩雲中鴈。焉知沙塞寒。復云。達磨西來。單傳心印。不立文字。直指人心。見性成佛。諸人還見性也未。此性。上至諸佛。下至凡夫。蠢動含靈。平等無異。譬如礦中金。石中玉。木中火。地中水。若無善巧方便。此金此

玉。此火此水。終不能出。又如琴瑟笙簧。琵琶[竺-二+秦]筭。雖有妙音。若無妙指。終不能發。是知。指不妙則五音不成。智不巧則一心不現。若能於此一念回光。如夢覺人。了無所得。又如磨鏡。垢盡明現。一切眾生。不能直下明心見性者。良由無始時來。顛倒妄想。障閉心光。昔有汾陽和尚。凡見僧來。便云莫妄想。凡有所問。皆云莫妄想。院主云。人傳和尚佛法。只有一句子。今後休得也。自後汾陽。凡見人來。只云休得也。師云。古人不欲學者所聞勝如所得。故言不敢華。解不敢作。直截向你道。莫妄想休得也。諸人還休得也未。諸人每日開眼至合眼。所作所為。無非妄想。至於睡夢之中。亦是妄想。妄想一起。顛倒萬端。開塵勞門。迷清淨界。若能識得妄想根源。直下休歇去。上無佛求。下無魔怖。中無生戀。亦無死畏。便是清淨本源。天真妙道。若不識妄想根源。輪回三界。汨沒四生。出此入彼。未有休息。山僧自來多口。今朝狹路相逢。普勸諸人。記取汾陽一段因緣。誦取慧林兩首拙偈。可以向人天路上。做得箇小歇場。願世世生生常同法會。偈云。莫妄想好參詳。不知終日為誰忙。若知忙裏真消息。一朵蓮花生沸湯。休得也便好休。百年浮幻水中漚。自家屋裏天真佛。切忌區區向外求。

檀越請上堂。師云。祖師心印沒多般。悟得無勞指一彈。剔起眉毛如不薦。春風依舊著人寒。若論此事。譬如三春時雨。高下普霑。萬紫千紅。悉皆蒙潤。葡萄得之酸。甘草得之甜。黃連得之苦。生薑得之辣。非雨有酸甜苦辣之味。皆是根氣所受不同故也。般若之法。亦復如是。如來一音演說法。眾生隨類各得解。或得之為諸佛。或得之為菩薩。或得之為聲聞。或得之為緣覺。或得之為凡夫。其實皆一法也。不見。讓和尚為馬大師曰。汝學心地。猶如下種。我說法要。譬若春澤。因緣會遇。當得見道。然雖如是。且道。無陰陽田地上。生得箇甚麼。良久云。炳若丹青明似日。箇中誰敢錯商量。師復云。適來智海禪師。勸相公道。須是捉獲六賊。方可一心安穩。誠哉是言。試問諸人。還識者六箇賊麼。若識不破。終日被他劫掠家寶。損耗法財。且道。這六箇賊。如何可捉。須是執智慧刀。被堅固鎧。張勇猛弓。駕精進箭。向五蘊山下。生死岸頭。法鼓一鳴。便見草賊大敗。恁麼捉賊。猶費力在。慧林道。一群六箇賊。生生欺殺人。我今識汝也。不共你相親。你若不服我。我則到處說。教人盡識汝。遣汝行路絕。你若背服我。我則不分別。共你一處住。同證無生滅。恁麼明得。方知魔即佛也。佛即魔也。魔佛不二。生死界空。記得于頤相公。參見紫玉和尚。便問。如何是佛。玉召相公。公應喏。玉云。更莫別求。後藥山知得云。大小大于頤相公。噫可惜。生埋紫玉山下。相公聞得。乃往見藥山。公便問。如何是佛。藥山召相云。公應喏。山云。是什麼。相公大悟。師復云。藥山紫玉。雖則慈悲之故。翻成落草之談。流布叢林。未免挂人唇齒。忽若相公今日問慧林如何是佛。山僧只向他道。忠孝一心清似水。功名千古重如山。碧幢紅旆照春色。贏得高堂白晝閑。

莘王生日請陞座。師云。佛身無相。染淨皆空。妙體湛然。悟迷俱妄。蓋為慈悲之故。從大悲願力。示現受生。直得一手指天。一手指地。周行七步。目顧四方。大用現前。作獅子吼。便道。我降生時。見百億微塵剎土眾生。同時降生。我成道時。見百億微塵剎土眾生。同時成道。或現帝釋身。或現大自在天身。或現長者身。或現居士身。或現小王身。所謂處處真。處處真。塵塵盡是本來人。雖然如是。正當今日。節角一句。作麼生道。良久云。天上碧桃和露種。日邊紅杏倚雲栽。師復云。記得昔日趙州在方丈坐。侍者報大王來。趙州下禪床叉手云。大王萬福。侍者云。未至。方且來報。州云。又道來也。師云。看。他古人見地明白。受用處不妨省力。學者癮心。多是對面蹉過。諸人若向這裏會得。莘國大王。不離府地。常見慧林。慧林不下禪床。常與大王相見。所以道。定光金地遙招手。智者江陵暗點頭。其或不然。山僧拙頌。用祝大王之壽。洞中春色四時好。雲外峯巒一[打-丁+羨]高。用祝賢王龜鵠筭。年年洗眼看蟠桃。以拂子擊禪床。下座。

閉爐陞座。師云。纔見開爐又閉爐。寒來暑往只須臾。庭前殘雪方消盡。嶺上春雲已卷舒。滿目更無心外法。幾人曾悟鬢中珠。祖師莫不叮嚀語。自是時人見處癮。祖師之道。惟證方知。苟非其人。翻成戲論。所以佛法以無心為宗。無門為法門。無門之門。直須得入。無心之心。要在妙悟。是故。花紅柳綠。無非清淨法身。鼓響鍾鳴。盡是廣長舌相。堂堂門戶。進步者稀。歷歷音聲。善聽者少。祖不云乎。應耳時若幽谷。大小音聲無不足。十方鍾鼓一時鳴。靈光韻韻常相續。師以拂子擊禪床云。還聞麼。圓通問大啟。何事隔雲泥。

檀越請陞座。師云。壁立萬仞。脚跟下踏轉生死輪。坐斷千差。頂門上拶出金剛眼。明如皎日。快似吹毛。離見絕聞。當陽顯赫。然雖如是。更須知有衲僧殺活拄杖子始得。作麼生是衲僧殺活拄杖子。煩惱海中。用這拄杖子。□舟為楫。嶮惡道中。用這拄杖子。為燭為燈。三世諸佛。若無此拄杖子。將什麼度生。六代祖師。若無此拄杖子。將什麼傳法。天下老和尚。若無此拄杖子。將什麼驗人。諸人若無此拄杖子。將什麼上來下去。寺亟若無此拄杖子。將什麼致君澤民。奉親行孝。既各各有這拄杖子。因什麼問著時拈不出。只為拋離日久。埋沒時長。不肯承當。自家諱却。不見道。拈來放去無遮障。擊著千門萬戶開。

上堂。歸根得旨。百草頭薦取老僧。隨照失宗。三根椽下照顧鼻孔。昔日僧問趙州和尚。萬法歸一。一歸何處。州云。我在青州作一領布衫。重七斤。有般底。聞人恁麼舉。便道。趙州問東答西。不存稟臼。且是辜負手也。且道。趙州旨趣。在什麼處。良久云。水因有月方知淨。天為無雲始見高。

上堂。舉僧問弘覺禪師。僧家畢竟如何。覺云。居山好。僧便作禮。覺云。你作麼生會。僧云。出家人。於善惡逆順生死境界。如山之不動。覺便打云。辜負先聖。喪我兒孫。覺復問傍僧云。你作麼生會。僧云。眼不見玄黃之色。耳不聞絲竹之聲。

覺又打云。辜負先聖。喪我兒孫。師云。道人行處。如火消冰。鳥道玄途。轉身有路。這僧若是箇漢。纔見他道作。作麼生會。但云。和尚刀耕。學人火種。和尚煎茶。學人掃地。若下這一轉語。直饒弘覺老子。門深似海。道重如山。聲色形容。不可干犯。也須教滿面是笑。

上堂。舉睦州示眾。未得箇入頭處。須得箇入頭處。既得箇入頭處。不得辜負老僧。有僧出禮拜云。某甲終不敢辜負和尚。州云。早是辜負了也。師云。那裏是這僧辜負處。或云。這僧不合出來禮拜。只如不出禮拜。還是辜負耶。不是辜負耶。直饒不出。也是辜負古人。如何得不辜負去。到這裏。須是箇人始得。只管向識情上卜度。言句中計較。無有是處。還知睦州恁麼道。已是辜負眾人了也。諸人檢點得出麼。老婆臨死三回別。眼裏無筋一世貧。

上堂。舉僧參趙州。適值趙州以衲衣蓋頭而坐。僧便退。州云。闍梨莫道老僧不祇對。又僧問法眼。請和尚廣開方便。與學人入路。眼遂拍手一下。師云。諸人要會二尊宿意麼。譬如淨掃洒一條路。送人到家。只是人不肯移腳。忽然移腳時如何。慈受叟。與你提瓶挈鉢。

王述古淑人請上堂。佛佛授手。惟此一機。祖祖相傳。只明這箇。這箇若透得輪迴息。這箇不透。則生死因。所以道。不省這箇意。修行徒苦辛。若向這裏。千眼頓開。一時照破。行也是這箇。坐也是這箇。一嗔一喜。動靜施為。不出這箇道理。如黃金之黃。碧天之碧。更無毫髮異相。然雖如是。却須知有向上一路始得。如何是向上一路。丈夫自有衝天志。莫向如來行處行。師復云。舍利弗入城。逢月上女出城。舍利弗問。向什麼處去。月上女云。如舍利弗恁麼去。舍利弗云。我方入城。汝已出城。如何說得箇舍利弗恁麼去。女曰。如來弟子。當依何住。舍利弗云。當依涅槃住。女云。如來弟子。當依大涅槃住。我如舍利弗恁麼去。師云。他家雖是箇女人。宛有丈夫之作。然雖如是。彼此未有衲僧鼻孔在。敢問諸人。那裏是未有衲僧鼻孔處。請問○圓悟禪師。

寶公在塔上現相。府官請陞座。師云。毗盧寶印。處處全彰。金剛眼睛。頭頭漏泄。無一人而不具足。無一法而不圓成。百匝千重。透頂透底。所以道。淨妙法身。本無出沒。大悲願力。示現世間。或現宰官身。或現比丘身。或於一目中。流出八萬四千清淨寶眼。或於一臂中。分出八萬四千母陀羅臂。或於一面中。化出十二面殊勝之相。尋聲救苦。慈眼視人。如谷答響。似鏡現相。解群生倒懸之急。扶世間累卵之危。時時曲盡老婆心。處處要明這一著。正當恁麼時。一句作麼生道。獨龍峯頂無根草。散作閻浮大地春。

佛圓寂日上堂云。大覺世尊。二千年前二月十五日。入般涅槃。今之弟子。每至斯辰。而生悲仰。敢問諸人。且道。果曾入滅耶。不曾入滅耶。若定當得。方明佛法旨趣。若定當不得。任是波旬也皺眉。記得唐順宗皇帝。問西京如滿禪師。佛從何方

來。滅向何方去。既言長在世。只今在何處。滿云。佛從無為來。滅向無為去。法身等虛空。長在無心處。師云。好。諸人者。龍牙云。君今欲得易成佛。無念之心不較多。然雖如是。因甚僧問洞山。如何是佛。山云。麻三斤。僧問首山。如何是佛。首山云。新婦騎驢阿家牽。到者裏。如何和會。如何商量。聽取蔣山注脚。妙中妙玄中玄。須信壺中別有天。鐵樹花開春氣早。曉來風雨滿山川。

真如上座。設水陸薦金山僧行。上堂。舉林楊和尚有頌曰。來年二月二。四大相拋棄。白骨散長江。免占檀那地。至遷化日陞座。有僧問。雲愁霧慘。大眾嗚呼。乞賜一言。楊垂下一足。進云。恁麼則法鏡不臨於此土。寶月又照於何方。楊云。非公境界。進云。漚生漚滅還歸水。師去師來本是常。楊喝云。臨行之際。更莫忉忉。收足便化。師云。且道。古人具箇什麼道理。去住自如。若道有箇道理。眼裏生花。若道無箇道理。花生眼裏。畢竟如何。師拍膝一下云。家貧未是貧。路貧愁殺人。前日賊至金山。慘酷如此。誠不忍聞。顯忠敏和尚。并堂中眾僧。例遭毒手。肝腦塗地。流血滿山。是何因緣。際會于此。今日真如上座。特罄衣盂。作齋追悼。願諸上善人。悟生死之本空。了冤親之平等。昔日神觀禪師。因下山赴齋。路逢惡賊。賊欲割刃。觀云。我不畏死。昨日輒許一檀越齋。不忍爽信。容我回來。受汝之殺。賊然之。既回。就賊殺之。賊既去。觀遂將所斬之頭。却安項上。徐徐而歸。鳴鼓陞堂云。汝等諸人。還聞無頭人說法麼。良久頭落。眾人方知被賊所害。師云。且道。是何三昧。既被他一刀兩段了也。不知拈起頭向須上者是誰。說法者是誰。若也知得。方知生死去處。不唯自知生死去處。亦乃知神觀禪師去處。不唯知神觀禪師去處。亦迺知金山諸兄弟去處。且道。許多禪和子。向什麼處去也。莫是行船由在把梢人麼。莫是聚沫任風吹麼。莫是恰似斬春風麼。總不是這箇道理。慈受老僧。與你下一轉語。正似五百羅漢過海。各騁神通。神通大者。騎龍跨鳳。自在逍遙。神通小者。便乃浮杯泛海。速登彼岸。無神通者。未免拖泥帶水。一場狼籍。伏惟珍重。

### 慈受深和尚廣錄卷第三

## 慈受深和尚廣錄卷第四

頌古下

### 侍者 普紹 錄

舉阿難問迦葉。世尊傳金欄外。別傳何物。迦葉召阿難。阿難應諾。迦葉云。倒却門前剎竿著。

頭陀飲光。多聞慶喜。合掌擎拳。難兄難弟。一朝狹路兩相逢。裂轉雙睛無處避。便向門前倒剎竿。丈夫自有衝天志。

百丈每至陞堂。常有一老人。隨眾聽法。一日參退。老人不去。丈乃問。立者何人。老人云。某甲非人。於過去生中迦葉佛時。曾住此山。有僧問。大修行人。還落因果也無。某甲對云。不落因果。墮野狐中。經五百生。今請和尚。代一轉語。丈云。你問來。老人云。大修行底人。還落因果也無。丈云。不昧因果。老人言下大悟。

不落與不昧。前後百丈語。毫髮若參差。鐵山橫在路。豈不見。藍田當年人射虎。初時一箭沒其羽。子細看來元是石。再欲射時射不入。幾乎慎殺李將軍。千古令人空歎息。

天衣懷和尚。赴池州杉山請。初入院上堂云。二十年樂慕此山。今日且喜因緣際會。山僧未到此山。身先到此山。及乎到來。杉山却在山僧身內。

移身換步老天衣。不惜眉毛幾箇知。今日若明當日事。江南日暖鷓鴣啼。

雲門云。衲僧家須有巴鼻。方識得天下人。如何是衲僧巴鼻。代云德山。

雲門舌上有龍泉。愛把金針黑處穿。要會衲僧巴鼻子。一條紅線兩人牽。

昔有一婆。將銀一百兩。請趙州和尚看經一藏。趙州接得施利。遂下禪床。繞一帀云。傳語婆婆。已為看經了。婆聞云。比來請看一藏。為什麼祇看半藏。

走下禪床行一轉。看了如來五千卷。婆子年高眼尚明。夜深月下穿針線。

梁武帝。請傅大士講經。大士纔登高座。揮按一下。便下座。帝愕然。志公問。陛下還會麼。帝云。不會。志公云。大士講經竟。

大士講經竟。揮案成注脚。一丸療眾病。不假驢駘藥。

趙州問僧。曾到此間否。僧云。曾到。州云。喫茶去。又問僧。曾到此間否。僧云。不曾到。州云喫茶去。院主問。和尚曾到也是喫茶去。不曾到也是喫茶去。意作麼生。州喚院主。主應諾。州云。喫茶去。

曾到喫茶去。未到喫茶去。趙州老禪和。口刮心裏苦。心裏苦。直至如今無雪處。

張拙秀才。因看千佛名經。問長沙岑和尚。百千諸佛。祇聞其名。未審。居何國土。岑云。黃鶴樓崔皓題後。秀才還曾題麼。拙云。不曾題。本云。無事也好題取一篇。

海水有時終見底。人生到死不知心。秀才若會翻身句。管取白衣入翰林。

裴相。出鎮死陵。遊開元寺。見壁上繪高僧像。遂問僧職云。高僧儀相可觀。未審。高僧在甚麼處。于時。僧職莫知所措。公云。此間有禪僧麼。僧職云。近有一僧。捨身掃地。身披百衲。恐是。及乎請得來。乃黃蘖斷際運禪師也。裴相乃舉前話問黃蘖。蘖乃召相公。公應喏。蘖云。是什麼。相公豁然大悟。

鄆城寶劍沉埋久。一道寒光射斗牛。不是張華辨端的。只應千古枉淹苗。

鴻山一日坐次。仰山從外入來。鴻山以兩手握拳。相交示之。仰山便作女人拜。鴻山云。如是如是。

佳人十八正嬌癡。一曲堂前舞柘枝。祇有五郎知雅態。更無人道柳如眉。

雪峰云。三世諸佛。向火燄上。轉大法輪。雲門云。火燄為三世諸佛說法。三世諸佛立地聽。

阿誰踏著雪峰蹤。三世諸佛火燄中。賴有雲門相暖熱。火屋吹得滿堂紅。

踰山和尚。手握木蛇。有僧問。手中是什麼。踰山提起云。曹家女。

別面不如花有笑。離情難似竹無心。因人說著曹家女。引得相思病轉深。

龐婆入鹿門寺作齋。維那請疏意回向。龐婆拈梳子插向髻後曰。回向了也。便出去。

龐婆移轉髻邊梳。一段風流舉世無。萬事但將公道斷。維那不用筆頭書。

靈山□□□□□□□□□入定佛勑文殊□□□□□□□□□彈指一下女子□□□□□□□□□□王梵天  
撲下來□□□□□□□□□一人文殊出此□□□□□□□□□億文殊亦出不□□□□□□□能出此定語  
未竟□□□□□□□□□出定網明繞女子□□□□□□□□□□□□□云。文殊是七佛之師。為什麼出  
女子定不得。網明為什麼却出得。

長江輶底浪如銀。秋日白蘋紅蓼新。莫惱扁舟難到岸。行艙由在把梢人。

百丈再參馬祖。祖舉拂子。丈云即此用離此用。祖掛拂子於舊處。□□□□祖云。  
你已後開兩片皮將何為人。丈取拂子堅起。祖云即此用離此用。丈掛拂子於舊處。  
□□□黃蘖云。我當時被馬祖一喝。直得三日聖聾。

父子相逢臭味同。龍泉寶劍再磨礪。要明馬祖當年喝。大地山河盡耳聾。

踰山和尚問僧。什麼處來。僧云。嶺南來。山云。曾到雪峰麼。僧云。曾到。山  
云。我已前到時是事不足。如今作麼生。僧云。如今足。云粥足飯足。僧無語。雲門  
代云。粥足。

一條官路坦然平。無限遊人取次行。莫謂地平無險處。須知平地有深坑。

僧問雲門和尚。達磨面壁。意旨如何。師曰念七。又僧問南泉。達磨面壁。意旨  
如何。泉云。天寒無被蓋。

一人會上竿。一人會穿井。伎倆雖不同。總是一般病。若人識得這般病。衲僧鼻  
孔都穿盡。

夾山初住潤州京口鶴林寺。道吾到。遇上堂。僧問。如何是法身。夾山云。法身無相。僧云。如何是法眼。夾山云。法眼無瑕。道吾不覺失笑。夾山下座。請道吾。問云。適來祇對這僧話。必有不是處。望上座慈悲指示。道吾云。某甲終不說。請往秀州華亭。見缸子和尚。缸子纔見夾山。便問。大德住在甚寺。夾山云。寺則不住。住則不似。缸子云。汝道不似。不似箇甚麼。夾山云。不是目前法。缸子云。甚處學得來。夾山云。非耳目之所到。缸子云。一句合頭語。萬劫繫驢橛。垂絲千尺。意在深潭。離鈎三寸。子何不道。夾山擬開口。缸子便打落水。纔擬出。缸子又云。道道。夾山擬開口。缸子又打。夾山豁然大悟。乃點頭三下。缸子云。竿頭絲線從君弄。不犯清波意自殊。夾山云。拋綸擲釣。師意如何。缸子云。絲懸渙水浮。定有無之意。速道速道。夾山云。語帶玄而無路。舌頭談而不談。缸子云。釣盡江波金鱗始遇。夾山乃捨耳。缸子云。如是如是。

法身無相。法眼無瑕。因風吹火。借水獻花。絲毫不立。萬別千差。但看來年三二月。銜泥鷺子入人家。

鏡清問僧。門外什麼聲。僧云。簷頭雨滴聲。清云。眾生顛倒。迷己逐物。

簷頭雨滴。堵前地濕。法法現成。人信不刃。更問如何。長江水急。

僧問洞山。如何是佛。山云。麻三斤。

洞山麻三斤。斤兩不謾人。語稀難問事。貌古易傳神。

雲門一日般柴次。見僧拋下一片柴云。一大藏教。祇說這箇。玄沙云。一大藏教。不說這箇。

處處綠楊堪繫馬。家家門道透長安。一條大路平如掌。自是時人措足難。

僧問婆子。臺山路向甚麼處去。婆云。躉直去。僧纔行。婆云。好箇阿師。又恁麼去。前後凡問。皆如此答。僧舉似趙州。州云。待我為你勘破這老婆。遂往問臺山路向甚麼處去。婆云躉直去。州纔行。婆云。好箇阿師。又恁麼去。州回。舉似大眾云。我為你勘破這老婆了也。老宿拈云。什麼處是勘破處。

躉直去躉直去。草鞋跟斷人無數。唱歌須是帝鄉人。一箇拍兮一箇舞。舞得徹勿多般。趙州婆子特用瞞。今古五臺山下路。長松短檜聳雲端。

馬祖。與百丈西堂南泉翫月次。馬祖問百丈。正當恁麼時如何丈對云。正好供養。又問西堂。正好修行。南泉拂袖便行。馬祖云。經入藏。禪歸海。唯有普願。獨超物外。

馬祖捧出菱花鏡。王老親拈白玉槌。一擊當陽令瓦碎。此心能有幾人知。幾人知。兩箇分明是赤眉。風前月下揚家醜。笑倒靈山老古錐。

趙州訪一庵主。便云。有麼有麼。庵主豎起拳頭。州云。水淺不是泊舡處。便出。又訪一庵主。亦云。有麼有麼。庵主又豎起拳頭。州云。能縱能奪。能殺能活。禮拜而去。

上庵豎起拳頭。趙州左眼半斤。下庵豎起拳頭。趙州右眼八兩。君看陝府鐵牛。  
何似嘉州大像。若謂總沒譖訛。露柱燈籠合掌。

僧問雲門和尚。如何是超佛越祖之談。雲門云。餽餅。

雲門一枚餽餅。天下衲僧咬嚼。若非鐵作牙關。往往完鑪吞却。吞時易吐時難。  
莫道從來麵一般。踏看韶陽關捩子。方能平地起波瀾。

趙州一日在方丈內間。沙彌唱參。向侍者云。教伊去。侍者纔教去。沙彌便珍重  
。州向傍僧云。沙彌得入門。侍者在門外。

趙州門戶。都無關鎖。侍者癱心。當頭蹉過。靈利沙彌。珍重便行。師云。這裏  
下一轉語。有麼。良久無人應。師云。夜深歸堂向火。

僧問趙州。如何是祖師西來意。州云。庭前栢樹子。

趙州庭前栢。何似門外柳。大盡三十日。小盡二十九。更問事如何。合却口生口

。僧問雲門。如何是透法身句。門云。北斗裏藏身。

北斗藏身口。擬議即差訛。鑽天新鷄子。不戀舊時口。

雲門有時云。燈籠是你自己。把鉢盂噇飯。不是你自己。有僧問。飯是自己時如何。  
門云。這野狐精。三家村裏漢。門却云來來。口是你道飯是自己。僧云是。門云  
。驢年夢口三家村裏漢。

終朝噇飯費工夫。不識燈籠是鉢盂。多少三家村裏漢。忙忙樹上捉鮎魚。

僧問讓和尚。如鏡鑄像。像成後。光歸何處。讓云。如大德未出家時。相狀向什麼處去。  
僧成後為什麼不鑑照。讓云。雖口口口口口。

觸體裏眼見猶在。枯木中龍聲更狂。打破虛空光境盡。箇中別有好商量。

師拈香云。憶昔去年春。正當此時節。雙拳打破太虛空。無限家風渾漏泄。人中  
獅子喪全成。月裏麒麟鬪角折。鬪角折。金剛正眼難磨滅。千古令人誦不休。吹散紅  
爐一點雲。

師復召大眾云。莫恠家未破。破家人未大。一母生兒幾百般。誰知淨照禪師家業。  
到資福掃土而盡。然雖如是。開口喫飯。舉手穿衣。門裏出身。未是好手。平地上  
建立生涯。虛空裏捏成活計。身裏出門。始是丈夫。恁麼說話。孰是知音。子細推勘  
將來。大似外揚家醜。取笑於人。眾中莫有東家人死。西家助哀底麼。若無。山僧不免  
自哭去也。師以手掩面。哭云。蒼天蒼天。

忌辰拈香。一言道合。水乳和同。三處相從。師資契會。他家拳拳攀攀處。資福  
盡知。資福跛跛挈挈處。他家總見。有時千尋海底。把手共行。有時百尺竿頭。翻身  
直下。覩得見他底。誠謂沒齒難忘。覩不見他底。至今猶懷憤氣。山僧懷抱自分明。  
心無負人處。所以每至忌辰。不免為他設箇供子。燒一炷香。雖然世諦未忘。且要大  
家鈍置。遂顯示大眾云。燒香設供。諸人共知。且道。心不負人底句。作麼生道。良

久云。一回飲水一回噎。本自無情似有情。欲會箇中端的意。木雞啼作兩般聲。

忌辰拈香。箇事相承八百年。實無一法與人傳。今朝欲報無傳底。聊爇金鑪一炷煙。復云。便恁麼燒却。意亦未明。記得洞山和尚。一日為雲巖晟禪師作齋。有僧問。和尚當時在雲巖。得何指示。山云。我雖在彼。不蒙他指示。僧云。既不蒙他指示。因何却為他作齋。山云。爭敢違背他。僧云。和尚昔年發足在南泉。何故却承嗣雲巖。山云。我不重先師道德佛法。只重他不為我說破。僧云。未審肯他不肯他。山云。半肯半不肯。僧云。何不全肯。山云。我若全肯。則辜負先師。師云。洞山老子。大似事不前思。徒勞後悔。鼻孔既落他人手。說什麼半肯與全肯。說破不說破。大丈夫。直須一刀兩段。恩酬分明。然雖如是。也有一句子。今日對這老□道破。良久云。誰知老□千年腹。間有明珠徑十圓。

### 登雲從禪師入龕

師以手拍龕云。大眾。古佛也恁麼去。今佛也恁麼去。登雲禪師也恁麼去。何物不敗壞。是誰長堅固。諸人還知登雲去處也無。若知得。焦山一眾。與登雲同入涅槃。其或不然。有眼石人齊下淚。無言童子暗嗟嘆。

### 登雲從禪師下火

師舉起火把云。還知這老子平生行履處麼。慧日峯前。露出千生面目。石公山下。曾橫一葉慈航。調古神清風自高。貌頰骨剛人不顧。昔年拂袖。五湖風月與誰爭。今日重來。自是不歸歸便得。方喜收綸罷釣。高臥西庵。豈期葉落歸根。藏身北斗。恁麼恁麼即是。不恁麼不恁麼即難。鐵牛倒跨上須彌。玉笛橫吹喧碧落。這般伎倆。作者方知。剔起眉毛。請高著眼。今日為登雲老子。說箇光前絕後底末後句。遂將火把。遶龕行一匝云。恁麼若喚作火。又似髑髏前見鬼。若不喚作火。又是露柱後瞞人。且道。畢竟如何。師微笑云。誰人知此意。令我憶登雲。

### 因勝澄禪師下火

這老子。斗時枯槁。不近人情。四海獨孤標。一身無伴侶。雖則兩提祖印。實無一法與人。閨門端坐冷啾啾。夜靜獨為鬼神說。任你傍人惡發。我心終未和同。□時開眼對青山。自笑滿頭生白髮。不知他者。將為與時寡合。知他者。唯有焦山。不能更結世間緣。一等要行那畔路。且道。如何是那畔路。良久云。推倒巖前無影樹。要須火裏解翻身。

### 諸禪人下火

初秋夏末時。衲僧多欲去。不搭陳梢艙。便行泗州路。橫擔拄杖氣如雲。萬水千山都不顧。昨日通川方上入。隨例茫茫把不住。把不住。為君說箇臨歧句。枯木巖前差路多。別起眉毛著眼覲。

一身恍若風中燭。百歲端如水上漚。未到衲僧平穩處。臨行那得不生愁。欲得不生愁麼。閑時做却忙時事。

看看。雲凝大野。雪積長郊。時人迷尋徑之蹤。這僧有衝霄之路。休說普賢境界。須知一色無差。諸人還知這僧與普賢菩薩。向銀色世界裏。縱橫自在麼。此時若不尋蹤跡。便向峨嵋也不逢。

浮生岸樹井藤。畢竟終歸敗壞。這僧撩起便行。也是平生慶快。著上沒底芒鞋。拋下這箇皮袋。且道。律上人。拋下這箇皮袋了。向什麼處去。貧來始覺錢堪使。醒後方知酒悞人。

茶壇火猶在。延壽堂中人又終。方言身渾。同一夢中。是知三世諸佛亦是夢。六代祖師亦是夢。這僧做夢了也。敢問諸人。且道。夢見箇什麼。良久云。三十四年如轉掌。錢塘歸夢此時休。

水無變。地水分遶。百物不堅。一靈何往。若謂本無生死。也是座主家風。更言不屬去來。未是衲僧境界。畢竟作麼生商量。良久云。不許夜行。投明須到。

此一段事。自古及今。何人能免。若也未曾踏著祖師。設使辭如旺露。辯若傾珠。鼻孔遼天。氣衝牛斗。到如斯無你走透處。為什麼如此。多虛不如少實。

### 行者下火

汝幼入空門。方年二十五。鬚髮尚未除。幻身今日去。脫下布直裰。休問溫州路。大眾且道。既不問溫州路。向什麼處去。有佛處不得住。無佛處急走過。

### 田六娘子下火

師拈起火把云。還見麼。浮生三十二春秋。方始修行肯轉頭。底事又隨雲雨去。煙波江上使人愁。休休休。不用愁。聚散還同水上漚。直饒壽得三十歲。不免輸他這一籌。田六娘子。十一月三十日。輸他這一籌了也。還有人相救得麼。借你光明一炬火。照破從前五障身。

### 丁忠訓妻與女同下火

二十餘年寄此間。蓋蕪塵土翳朱顏。今朝子母應相賀。且喜春來返故關。復召大眾云。白骨兩函。紅燄一炬。將化為灰。作麼生說箇返故關底道理。良久云。野火燒不盡。春風吹又生。

### 魏先生下火

嗚呼魏大和。為人性純厚。雖居陋巷中。簞瓢甘自守。聚學訓童蒙。束脩粗糊口。歲晚好吾宗。悟世非長久。臨行囑妻子。叮嚀誠諸後。不學老莊周。說葬成虛謬。不學襄陽翁。與女爭先後。先生之意不如斯。欲効禪家破諸有。四眾雲臻。柴薪已就。雖然父子至親。到此如何可救。不須救。生前已付山僧手。一枝紅燄贈君行。看取神龜火裏走。

## 周秘校下火

大眾。漚生漚滅。蓋是尋常。石火電光。豈能長久。奈緣芝蘭未產。忽爾玉樹沉輝。縱饒百千才俊。無量聰明。到這裏一點也使不著。即今還有為他著力底麼。一枝丹桂煙霄後。決戰文章到此休。

## 登雲從禪師掩土

師以手握土云。此是登雲禪師收因結果處。復顧示云。莫問青囊與紫囊。箇中風水十分強。青龍東去雲頭轉。白虎西來山腳長。江月松風皆舊物。綠苔芳草盡吾鄉。瑠璃殿上無知識。木馬泥牛暗斷腸。不問湘南潭北。休論坎短離長。即今要見箇無縫罅底麼。良久云。白骨已埋三尺土。春秋空遶萬重山。

## 長靈卓禪師掩土

以手握土云。這老子。平生苦澀。惡嫌黃蘖老婆心。末後風流。唱箇雲門膈月曲。直得全身放下。披毛戴角總無妨。擺手便行。金鎖玄關留不住。莫問借胎得妙。且看轉位翻身。嘶風木馬杳無蹤。入海泥牛消息盡。嗚呼長靈禪師。一提祖印。三坐道場。行解相應。語意俱到。虛空面目。不許商量。生鐵脊梁。一生打硬。今則煙消火滅。雲散月圓。謾留白骨瘞荒郊。誰會長靈元不死。諸人者且道。如何說得箇不死底道理。若也明得。不妨好箇因緣。其或未然。不免土上加泥去也。還見麼。野鳥閑花無淚落。長松短檜有悲風。

## 諸禪人散灰

言公心地最精專。曾學焦山一味禪。今日滿盆盛白骨。翻身重上謝郎舡。言大師。記得舊時事麼。側耳聽云。舊時入室。貧道曾問他。清虛之理。畢竟無身。你這皮袋子。自何而得。雖則當時無語。如今正好參詳。一切眾生。只被箇皮袋子礙却。所以道不得。言大師。前日以打併這皮袋子了也。諸人如今還道得麼。若也道得。言公大師。今日切不浪施。其或未然。托起灰云。不入驚人浪。難逢稱意魚。

俗壽五十有三。出家一十八夏。平生行脚游方。多在鹽城興化。最好不曾參禪。免見鑽龜打瓦。今朝子細看來。也好一場詰霸。才公才公莫要怕。焦山布施你一轉古人話。淨裸裸赤洒洒。南北東西沒可把。忽然撞著閻羅王。拈起拂子驟口打。

迢迢萬里別西川。要學諸方五味禪。昨日焦山山下死。劍門關上月重圓。既是焦山山下死。因什麼却向劍門關上月重圓。究竟光明終一體。任他寒影落千江。

衲僧纔遇丙丁村。便作霜花骨一盆。火後始知梁不壞。翻身跳出是非門。法嚴上座。今日被他跳過了也。如今水步頭相別。諸人將什麼送他。遂敲盆云。嚴兄嚴兄。善為道路。從今換骨洗腸。更莫和混合土。熟處放教生。生處不要住。揚子江頭浪拍天。莫教濕却娘生袴。

宣州隆上人。叢林遊歷徧。一入焦山門。便下延壽院。終朝何轆轤。喫藥都無驗。火後一莖茆。眾人皆總見。隆上座。你還見這一莖茆麼。師遂作聽勢云。見麼。你既見。還得自由麼。又作聽勢云。更望和尚慈悲指示。你既得自由。更指示什麼。禪和子不知。將謂焦山長老。水步頭青天白日鬼語。遂拈起骨盆云。火後既能燒不壞。更須入水見長人。

#### 慈受深和尚廣錄卷第四(終)